

CHINESE-JAPANESE LIBRARY  
HARVARD-YENCHING INSTITUTE  
AT HARVARD UNIVERSITY

DEC 29 1963

T5299/217

(6)

少陵集

冊數	書名	函號	部類
六	杜工部集	一架二九八	別集

四十一之五十一  
外集

第二五九

詩集

四十五古	五律	排律	七古六	
四十五古	同律	排律	七古七七律	
四十五古	同律	排律	七古三七律	七絕一
四十五古	同律	排律	七古三七律	
四十五古	同律	排律	七古四七律	
四十五古	同律	排律	七古二排律	七絕一五絕
四十五古	同律	排律	七古二	
四十五古	同律	排律	七古一	
四十五古	同律	排律	七古三七律	
四十五古	同律	排律	七古二七律	七絕二五絕



杜工部集卷第四十一

大曆二年秋在夔州所作

別李義深

神堯十八子十七王其門道國及舒國實惟親弟昆  
 中外貴賤殊余亦忝諸孫丈人嗣王業之子白玉溫  
 道國繼德業請從丈人論丈人領宗卿肅穆古制敦  
 先朝納諫諍直氣橫乾坤子建文章壯河間經術存  
 溫克富詩禮骨清慮不喧洗然遇知己談論淮湖奔  
 憶昔初見時小襦繡芳蓀長成忽會面慰我久病魂  
 三峽春冬交江山雲霧昏正宜且聚集恨此當離樽



莫恠執盃遲我衰涕唾煩重問子何之西上岷江源  
願子少干謁蜀都足戎軒誤失將帥意不如親故恩  
少年早歸來梅花已飛翻努力慎風水豈惟數盤餐  
猛虎卧在岸蛟螭出無浪王子自愛惜老夫困石根  
生別古所嗟發聲爲爾吞

送高司直尋封閣州

丹雀銜書來暮棲何鄉樹驛驢事天子辛苦在道路  
司直非冗官荒山甚無趣借問泛舟人胡爲入雲霧  
與子姻婭間旣親亦有故萬里長江邊邂逅一相遇  
長卿消渴再公幹沉綿屢清談慰老夫開卷得佳句

時見文章士欣然淡情素伏枕聞別離疇能忍漂寓  
良會苦短促溪行水奔注熊罷咆空林游子慎馳騫  
西謁巴中侯艱難如跬步主人不世才先帝常特顧  
拔爲天軍佐崇大王法度淮海生清風南翁尚思慕  
公宮造廣厦木石乃無數初聞伐松栢猶卧天一柱  
我瘦書不成成字讀亦誤爲我問故人勞心練征  
戍

壯遊

往者十四五出遊翰墨場斯文崔魏徒以我似班揚  
七齡思即壯開口詠鳳凰九齡書大字有作成一囊

性豪業嗜酒、嫉惡懷剛腸、脫略小時輩、結友皆老蒼、  
飲酣視八極、俗物都茫茫、東下姑蘇臺、已具浮海航、  
到今有遺恨、不得窮扶桑、王謝風流遠、闔廬丘墓荒、  
劔池石壁仄、長洲芰荷香、嗟峨閭門北、清廟映回塘、  
每趨吳泰伯、撫事淚浪浪、枕戈憶勾踐、渡浙想秦皇、  
蒸魚聞七首、除道晒要章、越女天下白、鑑湖五月涼、  
剡溪蘊秀異、歸帆拂天燒、中歲貢舊鄉、氣廟屈賈壘、  
欲罷不能忘、目短曹劉牆、忤下考功第、獨辭京尹堂、  
放蕩齊趙間、裘馬頗清狂、春歌叢臺上、冬獵青丘旁、  
呼鷹阜櫪林、逐獸雲雪岡、射飛曾縱輕、引臂落鵝鶻、  
蘇侯據鞍喜、

忽如携葛彊、快意九年西歸到咸陽、許與必詞伯、  
賞遊實賢王、曳裾置醴地、奏賦入明光、天子廢食召、  
羣公會軒裳、脫身無所愛、痛飲信行藏、黑貂不免弊、  
斑鬢兀稱觴、杜曲晚耆舊、四郊多白楊、坐深鄉黨敬、  
日覺死生忙、朱門任傾奪、赤族迭罹殃、國馬竭粟豆、  
官雞輸稻粱、舉隅見煩費、引古惜興亡、河朔風塵起、  
岷山行幸長、兩宮各警蹕、萬里遙相望、崆峒殺氣黑、  
少海旌旗黃、禹功亦命子、涿鹿親戎行、翠華擁吳岳、  
螭虎嗽豺狼、爪牙一不中、胡兵更陸梁、大軍載草草、  
凋瘵滿膏肓、備員竊補衮、憂憤心飛揚、上感九廟焚、

下憫萬民瘡斯時伏青蒲廷爭守御床君辱敢愛死  
赫怒幸無傷聖哲體仁恕宇縣復小康哭廟灰燼中  
鼻酸朝未央小臣議論絕老病客殊方鬱鬱苦不展  
羽翮困低昂秋風動哀壑碧蕙捐微芳之推避賞從  
漁父濯滄浪榮華敵勳業歲暮有嚴霜吾觀鷓夷子  
才力出尋常羣兒逆未定側佇英俊翔

君不見簡蘇侯

君不見道邊廢棄池君不見前者摧折桐百年死樹  
中琴瑟一斛舊水藏蛟龍丈夫蓋棺事始定君今幸  
未成老翁何恨憔悴在山中深山窮谷不可處霹靂

魍魎兼狂風

贈蘇侯

異縣昔同遊各云厭轉蓬別離已五年尚在行李中  
戎馬日衰息乘輿安九重有才何棲棲將老委所窮  
為郎未為賤其奈疾痛攻子何面黧黑焉得豁心胃  
巴蜀倦剝劫下愚成土風幽薊已削平荒徼尚彎弓  
斯人脫身來豈非吾道東乾坤雖寬大所適裝囊空  
肉食晒菜色少壯欺老翁况乃主客間古來偏側同  
君今下荆楊獨帆如飛鴻二州豪俠場人馬皆自雄  
一請甘飢寒再請甘養蒙

別蘇侯赴湖南幕

故人有遊子、棄擲傍天隅、佗日憐才命、居然屈壯圖、  
十年猶塌翼、絕倒為驚呼、消渴今如在、提携愧老夫、  
豈知臺閣舊、洗拂鳳凰雛、得實翻蒼竹、棲枝把翠梧、  
北辰當宇宙、南嶽據江湖、國帶嵐塵色、兵張虎豹符、  
數論封內事、揮發府中趨、贈爾秦人策、莫鞭轅下駒、

反照

反照開巫峽、寒空半有無、已低魚復暗、不盡白鹽孤、  
荻岸如秋水、松門似畫圖、牛羊識童僕、既夕應傳呼、

向夕

畎畝孤城外、江村亂水中、深山催短景、喬木易高風、  
鶴下雲汀近、雞栖草屋同、琴書散明燭、長夜始堪終、

曉望

白帝更聲盡、陽臺曉色分、高峯寒上日、疊嶺宿霾雲、  
地折江帆隱、天清木葉聞、荆扉對麋鹿、應共爾為羣、

錦樹行

今日苦短、昨日休、歲云暮矣、增離憂、霜凋碧樹、作錦  
樹、萬壑東逝、無停留、荒戍之城、石色古、東郭老人、住  
青丘、飛書白帝、營斗粟、琴瑟几杖、柴門幽、青草萋萋、  
盡枯死、天馬跛足、隨羸牛、自古聖賢、多薄命、姦雄惡

少皆封侯故國三年一消息終南渭水寒悠悠五陵  
豪貴反顛倒鄉里小兒狐白裘生男墮地要膂力生  
女富貴傾邦國莫愁父母少黃金天下風塵兒亦得

赤霄行

孔雀未知牛有角渴飲寒泉逢觝觸赤霄玄圃須往  
來翠尾金花不辭辱江中淘河嚇飛燕銜泥却落羞  
華屋皇孫猶曾蓮勺困衛莊見貶傷其足老翁慎莫  
恠少年葛亮貴和書有篇丈夫垂名動萬年記憶細  
故非高賢

前苦寒行二首

漢時長安雪一丈牛馬毛寒縮如蝟楚江巫峽冰入  
懷虎豹哀號又堪記秦城老翁荆楊客慣習炎蒸歲  
締綌玄冥祝融氣或交手持白羽未敢釋

去年白帝雪在山今年白帝雪在地凍埋蛟龍南浦  
縮寒刮肌膚北風利楚人四時皆麻衣楚天萬里無  
晶輝三足之鳥足恐斷羲和送將安所歸

寄裴施州

廊廟之具裴施州宿昔一逢無此流金鐘大鏞在東  
序冰壺玉衡縣清秋自從相遇減多病三歲為客寬  
邊愁堯有四岳明至理漢二千石真分憂幾度寄書

白鹽北苦寒贈我青羔裘霜雪迴光避錦袖龍蛇動  
篋蟠銀鈎紫衣使者辭復命再拜故人謝佳政將老  
已失子孫憂後來况接才華盛

奉酬薛十二丈判官見贈

忽忽峽中睡悲風方一醒西來有好鳥為我下青冥  
羽毛淨白雪慘淡飛雲汀既蒙主人顧舉翮唳孤亭  
持以比佳士及此慰揚舲清文動哀玉見道發新硯  
欲學鷓夷子待勒燕山銘誰重斬蛇劍致君君未聽  
志在騏驎閣無心雲母屏卓氏近新寡豪家朱門扃  
相如才調逸銀漢會雙星客來洗粉黛日暮拾流螢

不是無膏火勸郎勤六經老夫自汲澗野水日泠泠  
我歎黑頭白君看銀印青卧病識山鬼為農知地形  
誰矜坐錦帳苦厭食魚腥東南兩岸圻橫水注滄溟  
碧色忽惆悵風雷搜百靈空中有白虎赤節引娉婷  
自云帝里女嘆雨鳳凰翎襄王薄行跡莫學冷如丁  
千秋一拭淚夢覺有餘馨人生相感動金石兩青瑩  
丈人但安坐休辨渭與涇龍蛇尚格鬪洒血暗郊坰  
吾聞聰明主治國用輕刑銷兵鑄農器今古歲方寧  
文王日儉德俊乂始盈庭榮華貴少壯豈食楚江萍  
杜工部集卷第四十一



杜工部集卷第四十二  
大曆二年在夔州所作

晚晴

高唐暮冬雪壯哉舊瘴無復似塵埃崖沉谷沒白皚  
皚江石缺裂青楓摧南天三旬苦霧開赤日照耀從  
西來六龍寒急光徘徊照我衰顏忽落地口中吟詠  
心中哀未怪及時少年子揚眉結義黃金臺泪乎吾  
生何飄零支離委絕同死灰

復陰

方冬合沓玄陰塞昨日晚晴今日黑萬里飛蓬映天

過孤城樹羽揚風直江濤簸岸黃沙走雲雪埋山蒼  
兕吼君不見夔子之國杜陵翁牙齒半落左耳聾

後苦寒行二首

南紀巫廬瘴不絕太古以來無尺雪蠻夷長老怨苦  
寒崑崙天關凍應折玄猿口噤不能嘯白鵠翅垂眼  
流血安得春泥補地裂  
晚來江門失大木猛風中夜吹白屋天兵斬斷青海  
戎殺氣南行動坤軸不爾苦寒何太酷巴東之峽生  
凌澌彼蒼迴幹人得知

夜歸

夜來歸來衝虎過山黑家中已眠卧傍見北斗向江  
低仰看明星當空大庭前把燭噴兩炬峽口驚猿聞  
一箇白頭老罷舞復歌杖藜不睡誰能那

寄栢學士林居

自胡之反持干戈天下學士亦奔波歎彼幽棲載典  
籍蕭然暴露向山阿青山萬里靜散地白雨一洗空  
垂蘿亂代飄零余到此古人成敗子如何荆揚春冬  
異風土巫峽日夜多雲雨赤葉楓林百舌雲黃泥野  
岸天雞舞盜賊縱橫甚密邇形神寂寞甘辛苦幾時  
高議排金門各使蒼生有環堵

寄從孫崇簡

嵯峨白帝城，東南有龍湫。北虎溪，吾孫騎曹不記。  
馬業學尸鄉，多養雞。龐公隱時盡室去，武陵春樹他  
人迷。與汝林居未相失，近身藥裹酒長携。牧叟樵童  
亦無賴，莫令斬斷青雲梯。

奉送蜀州栢二別駕將中丞命赴江陵起居

衛尚書太夫人因示從弟行軍司馬位

中丞問俗畫熊頻，愛弟傳書綵鷁新。遷轉五州防禦  
使，起居八座太夫人。楚宮臘送荆門水，白帝雲偷碧  
海春。與報惠連詩，不惜知吾斑鬢揔如銀。

昔遊

昔與高李輩，晚登單父臺。寒蕪際碣石，萬里風雲來。  
桑柘葉如雨，飛糞共徘徊。清霜大澤凍，禽獸有餘哀。  
是時倉廩實，洞達寰區開。猛士思滅胡，將帥望三台。  
君主無所惜，駕馭英雄材。幽燕盛用武，供給亦勞哉。  
吳門轉粟帛，泛海陵蓬萊。肉食三十萬，獵射起塵埃。  
隔河憶長眺，青歲已摧頽。不及少年日，無復故人盃。  
賦詩獨流涕，亂世想賢才。有能市駿骨，莫恨少龍媒。  
商山議得失，蜀主脫嫌疑。呂尚封國邑，傳說已鹽梅。  
景晏楚山深，水鶴去低徊。龐公任本性，携子卧蒼苔。

虎牙行

秋風歛吸吹南國天地慘慘無顏色洞庭揚波江漢  
迴虎牙銅柱皆傾側巫峽陰岑朔漠氣峰巒窈窕溪  
谷黑杜鵑不來猿狖寒山鬼幽憂雪霜逼楚老長嗟  
憶炎瘴三尺角弓兩斛力壁立石城橫塞起金錯旌  
竿蒲雲直漁陽突騎獵青丘犬戎鎖甲闡丹極八荒  
十年防盜賊征戍誅求寡妻哭遠客中宵淚霑臆

晚

杖藜尋晚巷炙背近墻暄人見幽居僻吾知養拙尊  
朝廷開府主耕稼學山村歸翼飛棲定寒燈亦閉門

荆南兵馬使太常卿趙公大食刀謠

太常樓船聲嗷嘈問兵刮寇起下牢放出令奔飛百  
艘猛蛟突獸紛騰逸白帝寒城駐錦袍玄冬示我胡  
國刀壯士短衣頭虎毛憑軒拔鞘天為高飈風轉日  
木怒號冰翼雪淡傷哀孫鐫錯碧鬩鷓膏鉉鏑已  
瑩虛秋濤鬼物撒揆辭坑壕蒼水使者捫赤條龍伯  
國人罷釣鼇芮公迴首顏色勞分閭救世用賢豪趙  
公玉立高歌起攬環結佩相終始萬歲持之護天子  
得君亂絲與君理蜀江如線針如水荆岑彈丸心未  
已賊臣惡子休干紀魑魅魍魎徒為爾妖腰亂領敢

欣喜用之不高亦不痺不似長劔須天倚吁嗟光祿  
英雄弭大食寶方聊可比丹青宛轉騏驎裏光芒六  
合無泥滓

大曆三年戊申在夔州所作

大歲日

楚岸行將老巫山坐復春病多猶是客謀拙竟何人  
閭闔開黃道衣冠拜紫宸  
紫光懸日月賜予出金銀  
愁寂鵝行斷參差虎穴鄰  
西江元下蜀北斗故臨秦  
散地逾高枕生涯脫要津  
天邊梅柳樹相見幾廻新

元日示宗武

汝啼吾手戰吾笑汝身長處處逢正月迢迢滯遠方  
飄零還栢酒衰病只藜床  
訓諭青衿子名慚白首郎  
賦詩猶落筆獻壽更稱觴  
不見江東第高歌淚數行

又示宗武

覓句新知律攤書解滿床  
試吟青玉案莫羨紫羅囊  
假日從時飲明年共我長  
應須飽經術已似愛文章  
十五男兒志三千弟子行  
曾參與游夏達者得升堂

遠懷舍弟穎觀等

陽翟空知處荆南近得書  
積年仍遠別多難不安居  
江漢春風起冰霜昨夜除  
雲天猶錯莫花萼尚蕭疎

對酒都疑夢、吟詩正憶渠、舊時元日會、那黨羨吾廬、  
續得觀書迎、就當陽、居止正月中、旬定出三峽、  
自汝到荆府、書來數喚吾、頌椒添諷詠、禁火卜歡娛、  
舟楫因人動、形骸用杖扶、天旋夔子峽、春近岳陽湖、  
發日排南喜、傷神散北吁、飛鳴還接翅、行序密啣蘆、  
俗薄江山好、時危草木蘇、馮唐雖晚達、終覲在皇都、  
將別巫峽贈南卿兄、襄西果園四十畝

苔竹素所好、萍蓬無定居、遠遊長兒子、幾地別林廬、  
雜藥紅相對、他時錦不如、具舟將出峽、巡圃念携鋤、  
正月喧鶯未、茲辰放鷁初、雪籬梅可折、風榭柳微舒、

託贈卿家有、因歌野興踈、殘生逗江漢、何處狎樵漁、  
送大理封主簿五郎親事不合却赴通州主簿前閬州賢子余與主簿平章鄭氏女子垂  
欲納采鄭氏伯父京書至女子已許他族親  
事遂停

禁鬻去東床、趨庭赴北堂、風波空遠涉、琴瑟幾虛張、  
渥水出騏驎、崑山生鳳凰、兩家誠款款、中道許蒼蒼、  
頗爲秦晉匹、從來王謝郎、青春動才調、白首缺輝光、  
玉潤終孤立、珠明得暗藏、餘寒折花卉、恨別滿江鄉、  
人日二首

元日到人日，未有不陰時。冰雪鸞難至，春寒花較遲。  
雲隨白水落，風振紫山悲。蓬鬢稀疏久，無勞比素絲。

又

此日此時人共得，一談一笑俗相看。樽前柏葉休隨  
酒，勝裏金花巧耐寒。佩劍衝星聊暫拔，匣琴流水自  
須彈。早春重引江湖興，直道無憂行路難。

月

萬里瞿塘月，春來六上弦。時時開暗室，故故滿青天。  
爽合風襟靜，當空淚臉懸。南飛有烏鵲，夜久落江邊。

江梅

梅蘂臘前破，梅花年後多。絕知春意早，最奈客愁何。  
雪樹元同色，江風亦自波。故園不可見，巫岫鬱嵯峨。

庭草

楚草經寒碧，庭春入眼濃。舊低收葉舉，新掩卷牙重。  
步履宜輕過，開筵得屢供。看花隨節序，不敢彊爲容。

月

併照巫山出，新窺楚水清。羈棲愁裏見，二十四迴明。  
必驗升沉體，如知進退情。不違銀漢落，亦伴玉繩橫。  
大曆三年春末下荊州所作

大曆三年春白帝城放船出瞿塘峽久居夔

府將適江陵漂泊有詩凡四十韻

老向巴人裏今辭楚塞隅入舟翻不樂解纜獨長吁  
窄轉深啼狖虛隨亂浴鳧石苔凌几杖空翠撲肌膚  
疊壁排霜劔奔泉濺水珠杳冥藤上下濃淡樹榮枯  
神女峰娟妙昭君宅有無曲留明怨惜夢盡失歡娛  
擺闔盤滯沸欹斜激浪輸風雷纏地脉冰雪曜天衢  
鹿角真走險狼頭如跋胡惡灘寧變色高郵負微軀  
書史全傾撓裝囊率壓濡生涯臨臬兀死地脫斯須  
不有平川決焉知衆壑趨乾坤霾漲海雨露洗春蕪  
鷗鳥牽絲颺驪龍濯錦紆落霞沉綠綺殘月壞金樞

泥笋苞初荻沙茸出小蒲鴈兒爭水馬燕子逐樁烏  
絕島容煙霧環洲納曉晡前聞辨陶牧轉眄拂宜都  
縣郭南畿好津亭北望孤勞心依憇息朗詠劃昭蘇  
意遣樂還笑衰迷賢與愚飄蕭將素髮汨沒聽洪鑪  
丘壑曾忘返文章敢自誣此生遭聖代誰分哭窮途  
卧疾淹為客蒙恩早廁儒廷爭酬造化樸直乞江湖  
漚瀕險相迫滄浪深可逾浮名尋已已嬾計却區區  
喜近天皇寺先披古畫圖應經帝子渚同泣舜蒼梧  
朝士兼戎服君王按湛盧旄頭初傲擾鶉首麗泥途  
甲卒身雖貴書生道固殊出塵皆野鶴歷塊匪轅駒



伊呂終難降、韓彭不易呼、五雲高太甲、六月曠搏扶、  
廻首黎元病、爭權將帥誅、山林託疲繭、未必免崎嶇、  
巫山縣汾州唐使君十八弟宴別兼諸公携  
酒樂相送率題小詩留于屋壁

卧病巴東久、今年強作歸、故人猶遠謫、茲日倍多違、  
接宴身兼杖、聽歌淚滿衣、諸公不相弃、擁別借光輝、  
春夜峽州田侍御長史津亭留宴得筵字

北斗三更席、西江萬里船、杖藜登水榭、揮翰宿春天、  
白髮須多酒、明星惜此筵、始知雲雨峽、忽盡下牢邊、  
杜工部集卷第四十二

杜工部集卷第四十三

大曆三年下荊州所作

送王十五判官扶侍還黔中得開字

大家東征逐子回、風生洲渚錦帆開、青青竹笋迎船  
出、白白江魚入饌來、離別不堪無限意、艱危須仗濟  
時才、黔陽信使應稀少、莫怪頻頻勸酒盃

宿青溪驛奉懷張員外十五兄之緒

漾舟千山內、日入泊荒渚、我生本飄飄、今復在何許、  
石根青楓林、猿鳥聚儔侶、月明遊子靜、畏虎不得語、  
中夜懷友朋、乾坤此深阻、浩蕩前後間、佳期付荆

楚

敬寄族弟唐十八使君

與君陶唐後盛族多其人聖賢冠史籍枝派羅源津  
在今氣磊落巧僞莫敢親介立實吾弟濟時肯殺身  
物白謹受玷行高無污真得罪永泰末放之五溪濱  
鸞鳳有鍛翻先儒曾抱麟雷霆霹長松骨大却生筋  
一失不足傷念子熟自珍泊舟楚宮岸戀闕浩酸辛  
除名配清江厥土巫峽鄰登陸將首途筆札枉所申  
歸朝跼病肺叙舊思重陳春風洪濤壯谷轉頗彌  
我能汎中流塘突鼉獺真長年以省施慰此貞良臣

泊松滋江亭

紗帽隨鷗鳥扁舟繫此亭江湖深更白松竹遠還青  
一柱全應近高唐莫再經今宵南極外甘作老人星  
行次古城店泛江作不揆鄙拙奉呈江陵幕  
府諸公

老年常道路遲日復山川白屋花開裏孤城麥秀邊  
濟江元自闊下水不勞牽風蝶勤依葉春鷗懶避船  
王門高德業幕府盛材賢行色兼多病蒼茫泛愛前  
乘雨入行軍六弟宅

曙角凌雲罷春城帶雨長水花分塹弱巢燕得泥忙

令弟雄軍佐，凡才污省郎。萍漂忍流涕，衰颯近中堂。  
宴胡侍御書堂

江湖春欲暮，牆宇日猶微。閶闔書籍滿，輕輕花絮飛。  
翰林名有素，墨客興無違。今夜文星動，吾儕醉不歸。  
書堂飲既夜，復邀李尚書。下馬月下賦絕句，  
湖水林風相與清。殘罇下馬復同傾，久拚野鶴如雙。  
鬢遮莫鄰雞下五更。

南征

春岸桃花水，雲帆楓樹林。偷生長避地，適遠更霑襟。  
老病南征日，君恩北望心。百年歌自苦，未見有知音。

地隅

江漢山重阻，風雲地一隅。年年非故物，處處是窮途。  
喪亂秦公子，悲涼楚大夫。平生心已折，行路日荒蕪。

歸夢

道路時通塞，江山日寂寥。偷生惟一老，伐叛已三朝。  
兩急青楓暮，雲深黑水遙。夢魂歸未得，不用楚辭招。

奉送蘇州李二十五長史文之任

星拆台衡地，曾爲人所憐。公侯終必復，經術竟相傳。  
食德見從事，克家何妙年。一毛生鳳穴，三尺獻龍泉。  
赤壁浮春暮，姑蘇落海邊。客間頭最白，惆悵此籬筵。

暮春江陵送馬大卿公恩命追赴闕下

自古求忠孝名家信有之吾賢富才術此道未磷緇  
王府標孤映霜蹄去不疑激揚音韻徹籍甚衆多推  
潘陸應同調孫吳亦異時北宸徵事業南紀赴恩私  
卿月昇金掌王春度玉墀薰風行應律湛露即歌詩  
天意高難問人情老易悲樽前江漢闊後會且深期  
暮春陪李尚書李中丞過鄭監湖亭泛舟得

過字

海內文章伯湖邊意緒多玉樽移晚興桂楫帶酣歌  
春日繁魚鳥江天足芰荷鄭莊賓客地衰白遠來過

蠶穀行

天下郡國向萬城無有一城無甲兵焉得鑄甲作農  
器一寸荒田牛得耕牛盡耕田蠶亦成不勞烈士淚  
滂沱男穀女絲行復歌

短歌行贈王郎司直

王郎酒酣拔劍斫地歌莫哀我能拔爾抑塞磊落之  
竒才豫樟翻風白日動鯨魚跋浪滄溟開且脫劍佩  
休徘徊西得諸侯棹錦水欲向何門跋珠履仲宣樓  
頭春已深青眼高歌望吾子眼中之人吾老矣

喜雨

南國旱無雨今朝江出雲入空纔漠漠洒迥已紛紛  
巢燕高飛盡林花潤色分晚來聲不絕應得夜深聞  
和江陵宋大少府暮春雨後同諸公及舍弟

宴書齋

渥注汗血種天上麒麟兒才士得神秀書齋聞爾爲  
棣華晴雨好綵服暮春宜朋酒日歡會老夫今始知  
宇文晁尚書之甥崔或司業之孫尚書之子

重泛鄭監前湖

郊扉俗遠長幽寂野水春來更接連錦席淹留還出  
浦葛巾欹側未迴船樽當霞綺輕初散棹拂荷珠碎  
却圓不但習池歸酩酊君看鄭谷去黃綠

奉賀陽城郡王太夫人恩命加鄧國太夫人

衛幕銜恩重潘輿送喜頻濟時瞻上將錫號戴慈親  
富貴當如此尊榮邁等倫郡依封土舊國與大名新  
紫誥鸞回紙清朝燕賀人遠傳冬笋味更覺綵衣春  
奕葉班姑史芬芳孟母隣義方兼有訓詞翰兩如神  
委曲承顏體騫飛報主身可憐忠與孝雙美盡麒麟

王兵馬使二角鷹

悲臺蕭瑟石龍從哀壑杙柯浩呼洵中有萬里之長  
江迴風陷日孤光動角鷹翻倒壯士臂將軍玉帳軒

勇氣二鷹猛，腦條徐墜目。如愁胡視天地，杉雞竹兔不自惜。虎孩野羊俱辟易，韝上鋒稜十二翻。將軍勇銳與之敵，將軍樹勲起安西。崑崙虞泉入馬蹄，白羽曾肉三狡狴。敢決豈不與之齊，荆南芮公得將軍。亦如角鷹下翔雲，惡鳥飛飛啄金屋。安得爾輩開其群，驅出六合梟鸞分。

惜別行送向卿進奉端午御衣之上都

肅宗昔在靈武城，指揮猛將收咸京。向公泣血灑行殿，佐佑卿相乾坤平。逆胡冥寞隨煙燼，卿家兄弟功名震。騏驎閣盡鴻鴈行，紫極出入黃金印。尚書勲業超千古，雄鎮荊州繼吾祖。裁縫雲霧成御衣，拜跪題封賀端午。向卿將命寸心赤，青山落日江潮白。卿到朝廷說老翁，漂零已是滄浪客。

夏日揚長寧宅送崔侍御常正字入京

醉酒揚雄宅，升堂子賤琴。不堪垂老鬢，還對欲分襟。天地西江遠，星辰北斗深。烏臺俯麟閣，長夏白頭吟。夏夜李尚書筵送宇文石首赴縣聯句

愛客尚書重之官宅相賢酒香傾座側，抗影駐江邊。程表郎官瑞鳧看，令宰仙雨稀雲葉。斷夜叉燭花偏數語，歌紗帽高文擲。綵牋興饒行處樂，離情醉中眠。

單父長多暇、河陽實少年、客居逢自出、爲別幾淒然。  
多病執熱奉懷李尚書

衰年正苦病、侵凌首夏何須氣、鬱蒸大水淼茫炎、海  
接竒峯碑兀火雲昇、思霑道暘黃梅雨、敢望宮恩玉  
井冰、不是尚書期不顧、山陰野雪興難乘。

水宿遣興奉呈羣公

魯鈍仍多病、逢迎遠復迷、耳聾須畫字、髮短不勝篔簹  
澤國雖勤雨、炎天竟淺泥、小江還積浪、弱纜且長堤、  
歸路非關北、行舟却向西、暮年漂泊恨、今夕亂離啼、  
童稚頻書札、盤飧詎糝藜、我行何到此、物理直難齊。

高枕翻星月、嚴城疊鼓鼙、風號虎豹水、宿伴鳧鷖、  
異縣驚虛往、同人惜解携、蹉跎長泛鷁、展轉屢聞雞、  
嶷嶷瑚璉器、陰陰桃李蹊、餘波期救涸、費日苦輕齎、  
支策門闌邃、肩輿羽翮低、自傷甘賤役、誰愍彊幽棲、  
巨海能無釣、浮雲亦有梯、勳庸思樹立、語默可端倪、  
贈粟困應指、登橋柱必題、丹心老未折、時訪武陵溪。

昔遊

昔謁華蓋君、綠袍崑玉脚、玉棺已上天、白日亦寂寞、  
暮升長岑頂、巾几猶未却、弟子四五人、入來淚俱落、  
余時遊名山、發軔在遠壑、良覲違夙願、含淒向寥廓。

林昏罷幽磬、竟夜伏石閣、王喬下天壇、微月映皓鶴、  
晨溪嚮虛馱、歸徑行已昨、豈辭青鞋胝、悵望金匕藥、  
東蒙赴舊隱、尚憶同志樂、伏事董先生、於今獨蕭索、  
胡爲客關塞、道意久衰薄、妻子亦何人、丹砂負前諾、  
雖悲髮變鬢、未憂筋力弱、杖藜望清秋、有興入廬霍、

江陵望幸

雄都元壯麗、望幸歛威神、地利西通蜀、天文北照秦、  
風烟含越鳥、舟楫控吳人、未枉周王駕、終期漢武巡、  
甲兵分聖旨、居守付宗臣、早發雲臺仗、恩波起涸鱗、

遣悶

地闊平沙岸、舟虛小洞房、使塵來驛道、城日避烏樞、  
暑雨留蒸濕、江風借夕涼、行雲星隱見、疊浪月光芒、  
螢鑿緣帷徹、蛛絲罥鬢長、哀箏猶僂几、鳴笛竟霑裳、  
倚着如秦贅、過逢類楚狂、氣衝看匣劍、穎脫撫錐囊、  
妖孽關東臭、兵戈隴右瘡、時清疑武略、世亂踣文場、  
餘力浮于海、端憂問彼蒼、百年從萬事、故國耿難忘、

江陵節度使陽城郡王新樓成王請嚴侍御

判官賦七字句同作

樓上炎天冰雪生、高飛燕雀賀新成、碧窻宿霧濛濛、  
濕朱拱浮雲細細、輕杖鉞褰帷、瞻具美、投壺散秩有



餘清自公多暇延叅佐江漢風流萬古情

又作此奉衛王

西北樓成雄楚都遠開山岳散江湖二儀清濁還高  
下三伏炎蒸定有無推轂幾年惟鎮靜曳裾終日盛  
文儒白頭授簡焉能賦媿似相如爲大夫

杜工部集卷第四十三

杜工部集卷第四十四

大曆三年下荊州所作

江漲

江發蠻夷漲山添雨雪流大聲吹地轉高浪蹴天浮  
魚鼈爲人得蛟龍不自謀輕帆好去便吾道付滄  
洲

毒熱寄簡崔評事十六弟

大火運金氣荆揚不知秋林下有塌翼水中無行舟  
千室但掃地閉門人事休老夫轉不樂旅次兼百憂  
蝮蛇暮偃蹇空床難暗投炎宵惡明燭况乃懷舊丘

開襟仰內弟執熱露白頭束帶負芒刺接居成阻脩  
何當清霜飛會子臨江樓載聞大易義諷詠詩家流  
蘊藉異時輩檢身非苟求皇皇使臣體信是德業優  
楚材釋杞梓漢苑歸驕駟短章達我心理爲識者籌  
江邊星月二首  
驟雨清秋夜金波耿玉繩天河元自白江浦向來澄  
映物連珠斷緣空一鏡升餘光憶更漏况乃露華凝

又

江門辭風纜江星別霧船雞鳴還曙色鷺浴自晴川  
歷歷竟誰種悠悠何處圓客愁殊未已他夕始相鮮

舟月對驛近寺

更深不假燭月朗自明船金刹青楓外朱樓白水邊  
城烏啼眇眇野鷺宿娟娟皓首江湖客釣簾獨未眠

舟中

風餐江柳下雨卧驛樓邊結纜排漁網連檣並米船  
今朝雲細薄昨夜月清圓飄泊南庭老祇應學水仙

遣懷

昔我遊宋中惟梁孝王都名今陳留亞劇則貝魏俱  
邑中九萬家高棟照通衢舟車半天下主客多歡娛  
白刃讎不義黃金傾有無殺人紅塵裏報答在斯須

憶與高李輩論交入酒壚兩公壯藻思得我色敷腴  
氣酣登吹臺懷古視平蕪芒碭雲一去鴈鶩空相呼  
先帝正好武寰海未凋枯猛將收西域長戟破林胡  
百萬攻一城獻捷不云輸組練棄如泥尺土負百夫  
拓境功未已元和辭大鑪亂離朋友盡合沓歲月徂  
吾衰將焉託存歿再嗚呼蕭條益堪媿獨在天一隅  
乘黃已去矣凡馬徒區區不復見顏鮑繫舟卧荆巫  
臨餐吐更食常恐違撫孤

舟中出江陵南浦奉寄鄭少尹審

更欲投何處飄然去此都形骸元土木舟楫復江湖  
社稷纏妖氣干戈送老儒百年同棄物萬國盡窮途  
雨洗平沙淨天銜闊岸紆鳴蟻隨泛梗別燕起秋菰  
棲託難高卧飢寒迫向隅寂寥相啜沫浩蕩報恩珠  
溟漲鯨波動衡陽鴈影徂南征問懸榻東逝想乘桴  
濫竊商歌聽時憂卞泣誅經過憶鄭驛斟酌旅情孤

官亭夕坐戲簡顏十少府

南國調寒暑西江浸日車客愁連蟋蟀亭古帶蒹葭  
不返青絲鞵虛燒夜燭花老翁須地主細細酌流霞

秋日荆南述懷三十韻

昔承推獎分媿匪挺生材遲暮官臣忝艱危哀職陪

揚鑣隨日馭折檻出雲臺罪戾寬猶活干戈塞未開  
星霜玄鳥變身世白駒催伏枕因超忽扁舟任往來  
九鑕巴嚙火三蟄楚祠雷望帝傳因實照王問不廻  
蛟螭深作橫豺虎亂雄猜素業行已矣浮名安在哉  
琴鳥曲怨憤庭鶴舞摧頽秋水漫湘竹陰風過嶺梅  
苦搖求食尾常曝報恩腮結舌防讒柄探腸有禍胎  
蒼茫步兵哭展轉仲宣哀飢藉家家米愁徵處處盃  
休爲貪士歎任受衆人咥得喪初難識榮枯劃易該  
差池分組冕合沓起蒿萊不必伊周地皆登屈宋才  
漢庭和異域晉史拆中台霸業尋常體宗臣忌諱災

羣公紛勦力聖慮宵徘徊數見銘鍾鼎真宜法斗魁  
願聞鋒鏑鑄莫使棟梁摧盤石圭多翦凶門較少推  
垂旒資穆穆祝網但恢恢赤雀翻然至黃龍不假媒  
賢非夢傳野隱類鑿顏坯自古江湖客冥心若死灰

江上

江上日多雨蕭蕭荆楚秋高風下木葉永夜攬貂裘  
勲業頻看鏡行藏獨倚樓時危思報主衰謝不能休

江漢

江漢思歸客乾坤一腐儒片雲天共遠永夜月同孤  
落日心猶壯秋風病欲蘇古來存老馬不必取長途

秋日荆南送石首薛明府辭滿告別奉薛尚  
書頌德叙懷斐然之作三十韻

南征爲客久西候別君初歲滿歸鳧鳥秋來把鴈書  
荆門留美化姜被就離居聞道和親入垂名報國餘  
連枝不日並八座幾時除往者胡星孛恭惟漢網除  
風塵相瀕洞天地一丘墟殿瓦鴛鴦拆宮簾翡翠虛  
鈎陳摧徼道槍槩失儲胥文物陪巡狩親賢病拮据  
公時呵禦猶首唱却鯨魚勢愜宗蕭相材非一范睢  
屍填太行道血走浚儀渠滏口師仍會函關憤已摠  
紫微臨大角皇極正乘輿賞從頻我冕殊恩再直廬

豈惟高衛霍曾是接應徐降集翻翔鳳追攀絕衆狙  
侍臣雙宋玉戰策兩穰苴鑿澈勞懸鏡荒蕪已荷鋤  
嚮來披述作重此憶吹噓白髮甘凋喪青雲亦卷舒  
經綸功不朽跋涉體何如應訝耽湖橘常餐占野蔬  
十年嬰藥餌萬里狎樵漁揚子淹投閣鄒生惜曳裾  
但驚飛熠燿不記改蟾蜍烟雨封巫峽江淮略孟諸  
湯池雖險固遼海尚填淤努力輸肝膽休煩獨起予

哭李尚書

漳濱與蒿里逝水竟同年欲挂留徐劍猶迴憶戴船  
相知成白首此別間黃泉風雨嗟何及江湖涕泫然

備文將管輅奉使失張騫史閣行人在詩家秀句傳  
客亭鞍馬絕旅櫬網蟲懸復魄昭丘遠歸魂素澹偏  
樵蘇封葬地喉舌罷朝天秋色凋春草王孫若箇邊

重題

涕泗不能收哭君餘白頭兒童相顧盡宇宙此生浮  
江雨銘旌濕湖風井邈秋還瞻魏太子賓客減應劉

獨坐

悲秋迴白首倚杖背孤城江飲渚洲出天虛風物清  
滄溟服衰謝朱紱負平生仰羨黃昏鳥投林羽翮輕

暮歸

霜黃碧梧白鶴棲城上擊柝復烏啼客子入門月皎  
皎誰家搗練風淒淒南渡桂水關舟楫北歸秦川多  
鼓鼙年過半百不稱意明日看雲還杖藜

哭李常侍嶧二首

一代風流盡修文地下深斯人不重見將老失知音  
短日行梅嶺寒山落桂林長安若箇畔猶想映貂金

又

青瑣陪雙入銅梁阻一辭風塵逢我地江漢哭君時  
次第尋書札呼兒檢贈詩發揮王子表不愧史臣辭

哭韋大夫之晉

樓集卷四  
悽愴郇瑕地、差池弱冠年。士人叨禮數、文律早周旋。  
臺閣黃圖裏、簪裾紫蓋邊。尊榮真不忝、端雅獨翛然。  
貢喜音容間、馮招疾病纏。南過駭倉卒、北思悄聯綿。  
鵬鳥長沙諱、犀牛蜀郡憐。素車猶慟哭、寶劍欲高懸。  
漢道中興盛、韋經亞相傳。冲融標世業、磊落映時賢。  
城府深朱夏、江湖眇霽天。綺樓高樹頂、飛旆泛堂前。  
帝幕旋風燕、笳簫急暮蟬。興殘虛白室、跡斷孝廉船。  
童孺交遊盡、喧卑俗事牽。老來多涕淚、情在強詩篇。  
誰繼方隅理、朝難將帥權。春秋褒貶例、名器重雙全。

久客

羈旅知交態、淹留見俗情。衰顏聊自哂、小吏最相輕。  
去國哀王粲、傷時哭賈生。狐狸何足道、豺虎正縱橫。

雨二首

青山淡無姿、白露誰能數。片片水上雲、蕭蕭沙中雨。  
殊俗狀巢居、曾臺附風渚。佳客適萬里、沉思情延佇。  
桂帆遠色外、驚浪滿吳楚。夕陰蛟螭出、寇盜復幾許。

又

空山中宵陰、微冷先枕席。回風起清曙、萬象萎已碧。  
落落出岫雲、渾渾倚天石。日假何道行、雨含長江白。  
連檣荊州船、有士荷矛戟。南防草鎮慘、霑濕赴遠役。

羣盜下辟山、揔戎備強敵、水深雲光廓、鳴櫓各有適、  
漁艇息悠悠、夷歌負樵客、留滯一老翁、書時記朝夕、  
夕雨期王將軍不至

○泉源冷、雜

天雨蕭蕭滯茅屋、空山無以慰幽獨、銳頭將軍來何  
遲、令我心中苦不足、數看黃霧亂玄雲、時聽嚴風折喬木、  
猿狖泥潭漠漠、飢鴻鵠歲暮窮陰耿未已、人生會面  
難、再得憶爾腰下鐵、絲箭射殺林中雪、色鹿前者坐  
皮、因問毛知子、歷險人馬勞異、獸如飛、星宿落、應弦  
不礙、蒼山高安得突騎、只五千、峯然眉骨皆爾曹、走  
平亂世相催促、一豁明主正鬱陶、憶昔范增碎玉斗

未使吳兵着白袍、昏昏闇闇閉氛祲、十月荆南雷怒  
號

見王監兵馬使說近山有白黑二鷹羅者久  
取竟未得王以毛骨有異他鷹恐臘後春生  
騫飛避暖勁翮思秋之甚眇不可見請余賦

詩二首

雲飛玉立盡清秋、不惜竒毛恣遠遊、在野只教心力  
破、千人何事網羅求、一生自獵知無敵、百中爭能耻  
下、韞鵬礙九天、須却避兔經三窟、莫深憂、  
黑鷹不省人間有、度海疑從北極來、正翮搏風超紫



塞玄冬幾夜宿陽臺  
虞羅自覺虛施巧  
春鴈同歸必見猜  
萬里寒空只一日  
金眸玉瓜不凡材

杜工部集卷第四十四

杜工部集卷第四十五

大曆三年移居公安下岳陽所作

移居公安山館

南國晝多霧北風天正寒  
路危行木杪身遠宿雲端  
山鬼吹燈滅厨人語夜闌  
雞鳴問前館世亂敢求安

夜

露下天高秋氣清  
空山獨夜旅魂驚  
踈燈自照孤帆宿  
新月猶懸雙杵鳴  
南菊再逢人卧病  
北書不至鴈無情  
步簷倚杖看牛斗  
銀漢遙應接鳳城

送覃二判官

先皇弓劍遠，小臣餘此生。蹉跎病江漢，不復謁承明。  
餞爾白頭日，永懷丹鳳城。遲遲戀屈宋，渺渺卧荆衡。  
鬼斷航舸失，天寒沙水清。肺肝若稍愈，亦上赤霄行。  
醉歌行贈公安顏少府請顧八題壁

神仙中人不易得，顏氏之子才孤標。天馬長鳴待駕，  
馭秋鷹整翮當雲霄。君不見東吳顧文學，君不見西  
漢杜陵老詩家。筆勢君不嫌，詞翰升堂為君掃。是日  
霜風凍七澤，烏蠻落照銜赤壁。酒酣耳熱忘頭白，感  
君意氣無所惜。一為歌行歌主客。

移居公安敬贈衛大郎

衛侯不易得，余病汝知之。雅量涵高遠，清襟照等夷。  
平生感意氣，少小愛文辭。河海由來合，風雲若有期。  
形容勞宇宙，質朴謝軒墀。自古幽人泣，流年壯士悲。  
水烟通徑草，秋露接園葵。入邑豺狼鬪，傷弓鳥雀飢。  
白頭供宴語，烏几伴棲遲。交態遭輕薄，今朝豁所思。  
公安送韋二少府匡贊

逍遙公後世，多賢送爾維。舟惜別筵念，我能書數字。  
至將詩不必，萬人傳時危。兵甲黃塵裏，日短江湖白。  
髮前古往今來，皆涕淚斷腸。分手各風烟。

贈虞十五司馬

遠師虞秘監，今喜識玄孫。形象丹青逼，家聲氣宇存。  
淒涼憐筆勢，浩蕩問辭源。爽氣全天豁，清談玉露繁。  
佇鳴南嶽鳳，欲化北溟鯤。交態知浮俗，儒流不異門。  
過逢連客位，日夜倒芳樽。沙岸風吹葉，雲江月上軒。  
百年嗟已半，四座敢辭喧。書籍終相與，青山隔故園。

公安縣懷古

野曠呂蒙營，江深劉備城。寒天催日短，風浪與雲平。  
灑落君臣契，飛騰戰伐名。維舟倚前浦，長嘯一含情。  
公安送李二十九弟晉肅入蜀，余下沔鄂。

正解柴桑纜，仍看蜀道行。檣烏相背發，塞鴈一行鳴。  
南紀連銅柱，西江接錦城。憑將百錢卜，飄泊問君平。

北風

北風破南極，朱鳳日威垂。洞庭秋欲雪，鴻鴈將安歸。  
十年殺氣盛，六合人烟稀。吾慕漢初老，時清猶茹芝。

憶昔行

憶昔北尋小有洞，洪河怒濤過輕舸。辛苦不見華蓋  
君，良岑青輝慘么麼。千崖無人萬壑靜，三步迴頭五  
步坐。秋山眼冷魂未歸，仙賞心違淚交墮。弟子誰依  
白茅室，盧老獨啓青銅鎖。巾拂香餘搗藥塵，階除灰

死燒丹火玄圃滄洲莽空闊金節羽衣飄婀娜落日  
初霞閃餘映倏忽東西無不可松風礮水聲合時青  
兕黃熊啼向我徒然咨嗟撫遺跡至今夢想仍猶佐  
秘訣隱文須內教晚歲何功使碩果更討衡陽董鍊  
師南遊早鼓瀟湘柂

宴王使君宅題二首

漢主追韓信蒼生起謝安吾徒自飄泊世事各艱難  
逆旅招邀近他鄉意緒寬不才甘朽質高卧豈泥蟠

又

沉愛容霜鬢留歡卜夜閑自吟詩送老相勸酒開顏

戎馬今何地鄉園獨在山江湖墮清月醪酌任扶還

覽栢中允兼子姪數人除官制詞因述父子

兄弟四美載歌絲綸

紛然喪亂際見此忠孝門蜀中寇亦甚栢氏功彌存  
深誠補王室勩力見元昆三止錦江沸獨清玉壘昏  
高名入竹帛新渥照乾坤子弟先卒伍芝蘭疊璵璠  
同心注師律灑血在戎軒絲綸實具載絃冕已殊恩  
奉公舉骨肉誅叛經寒溫金甲雪猶凍朱旗塵不翻  
每聞戰場說欬激懦氣奔聖主國多盜賢臣官則尊  
方當節鉞用必絕祲沴吾病日廻首雲臺誰再論

作歌挹盛事推轂期孤騫

留別公安太易沙門

隱居欲就廬山遠麗藻初逢休上人  
數問舟航留製作長開篋笥擬心神  
沙村白雪仍含凍江縣紅梅已放春  
先踏爐峰置蘭若徐飛錫杖出風塵

曉發公安數月憇息此縣

北城擊柝復欲罷東方明星亦不遲  
鄰雞野哭如昨日物色生能幾時舟  
楫眇然自此去江湖遠適無前期  
出門轉眄已陳迹藥餌扶吾隨所之

歲晏行

歲云暮矣多北風瀟湘洞庭白雲中  
漁父天寒網罟凍莫徭射鴈鳴桑弓  
去年米貴闕軍食今年米賤大傷農  
高馬達官厭酒肉此輩杼柚茅茨空  
楚人重魚不重鳥休汝枉殺南飛鴻  
况聞處處鬻男女割慈忍愛還租庸  
往日用錢捉私鑄今許鉉錫和青銅  
刻泥爲之最易得好惡不合長相蒙  
萬國城頭吹畫角此曲哀怨何時終

夜聞感策

夜聞感策滄江上衰年側耳情所嚮  
鄰舟一聽多感傷塞曲三更歛悲壯  
積雪飛霜此夜寒孤燈急管復

風湍君知天地干戈滿不見江湖行路難

發劉郎浦

挂帆早發劉郎浦疾風颯颯昏亭午舟中無日不沙塵岸上空村盡豺虎十日北風風未迴客行歲晚尤相催白頭厭伴漁人宿黃帽青鞋歸去來

泊岳陽城下

江國踰千里山城僅百層岸風翻夕浪舟雪灑寒燈留滯才雖盡艱危氣益增圖南未可料變化有鯢鵬

纜船苦風戲題四韻奉簡鄭十三郎判官

楚岸朔風疾天寒鷓鴣呼漲沙霾草樹舞雪渡江湖吹帽時時落維舟日日孤因聲置驛外爲覓酒家壚大曆四年己酉在岳陽至潭遂

登岳陽樓

昔聞洞庭水今上岳陽樓吳楚東南拆乾坤日夜浮親朋無一字老病有孤舟戎馬關山北憑軒涕泗流

陪裴使君登岳陽樓

湖濶兼雲霧樓孤屬晚晴禮加徐孺子詩接謝宣城雪岸叢梅發春泥百草生敢違漁父問從此更南征

贈韋七贊善

鄉里衣冠不乏賢杜陵韋曲未央前爾家最近魁三

象時論同歸尺五天北走關山開雨雪南遊花柳塞  
風烟洞庭春色悲公子蝦菜忘歸范蠡船

過南嶽入洞庭湖

洪波忽爭道岸轉異江湖鄂渚分雲樹衡山引舳艫  
翠牙穿裊蔣碧節吐寒蒲病渴身何去春生力更無  
壤童犁雨雪漁屋架泥塗歌側風帆滿微冥水驛孤  
悠悠迴赤壁浩浩略蒼梧帝子留遺恨曹公屈壯圖  
聖朝光御極殘孽駐艱虞才淑隨廝養名賢隱鍛鑪  
邵平元入漢張翰後歸吳莫怪啼痕數危檣逐夜烏

宿青草湖

洞庭猶在目青草續爲名宿業依農事郵籤報水程  
寒水爭倚薄雲月遞微明湖鴈雙雙起八來故北征

宿白沙驛初過湖南五里

水宿仍餘照人烟復此亭驛邊沙舊白湖外草新青  
萬象皆春氣孤槎自客星隨波無限月的近南溟

杜工部集卷第四十六  
大曆四年在潭州所作

湘夫人祠

蕭蕭湘妃廟空墻碧水春蟲書玉佩蘼蕪舞翠帷塵  
晚泊汀樹微馨借渚蘋蒼梧恨不盡淚染在叢  
筠

祠南夕望

百丈牽江色孤舟泛日斜興來猶杖屨目斷更雲沙  
山鬼迷春竹湘娥倚暮花湖南清絕地萬古一長嗟  
遣遇



磬折辭主人開帆駕洪濤春水滿南國朱崖雲日高  
舟子廢寢食飄風爭所操我行匪利涉謝爾從者勞  
石間采蕨女鬻菜輸官曹丈夫死百役暮返空村號  
聞見事略同刻剝及錐刀貴人豈不仁視汝若莠蒿  
索錢多門戶喪亂紛嗷嗷奈何黠吏徒漁奪成逋逃  
白喜遂生理花時貫緼袍

解憂

減米散同舟路難思共濟向來雲濤盤衆力亦不細  
呀吭瞥眼過飛櫓本無帶得失瞬息間致遠猶恐泥  
百慮視安危分明曩賢計茲理庶可廣拳拳期勿替

宿鑿石浦

早宿賓從勞仲春江山麗飄風過無時舟楫敢不繫  
回塘淡暮色日沒衆星嘒缺月殊未生青燈死分翳  
窮途多俊異亂世少恩惠鄙夫亦放蕩草草頻卒歲  
斯文憂患餘聖哲垂彖繫

早行

歌哭俱在曉行邁有期程孤舟似昨日聞見同一聲  
飛鳥數求食潛魚亦獨驚前王作網罟設法害生成  
碧藻非不茂高帆終日征干戈未揖讓崩迫開其情

過津口

南岳自茲近、湘流東逝深、和風引桂楫、春日漲雲岑、  
回道過津口、而多楓樹林、白魚困密網、黃鳥喧嘉音、  
物微限通塞、惻隱仁者心、甕餘不盡酒、膝有無聲琴、  
聖賢兩寂寞、眇眇獨開襟、

次空靈岸

汨汨逆素浪、落落展清眺、幸有舟楫遲、得盡所歷妙、  
空靈霞石峻、楓枯隱奔峭、青春猶無私、白日亦偏照、  
可使營吾居、終焉託長嘯、毒瘴未足憂、兵戈滿邊徼、  
嚮者留遺恨、耻為達人誚、迴帆觀賞延、佳處領其要、

宿花石戍

午辭空靈岑、夕得花石戍、岸疏開闢水、木雜今古樹、  
地蒸南風盛、春熱西日暮、四序本平分、氣候何迴互、  
茫茫天造間、理亂豈恒數、繫舟盤藤輪、策杖古樵路、  
罷人不在村、野圃泉自注、柴扉雖蕪沒、農器尚牢固、  
山東殘逆氣、吳楚守王度、誰能扣君門、下令減征賦、

早發

有求常百慮、斯文亦吾病、以茲朋故多、窮老驅馳併、  
早行篙師怠、席挂風不正、昔人戒垂堂、今則奚奔命、  
濤翻黑蛟躍、日出黃霧映、煩促瘴豈侵、頽倚睡未醒、  
僕夫問盥櫛、暮顏靦青鏡、隨意簪葛巾、仰慙林花盛、

側聞夜來寇，幸喜囊中淨。艱危作遠客，干請傷直性。  
薇蕨餓首陽，粟馬資歷聘。賤子欲適從，疑悟此二柄。

次晚洲

叅錯雲石稠，坡陀風濤壯。晚洲適知名，秀色固異狀。  
棹經垂猿把，身在度鳥上。擺浪散帙妨，危沙折花當。  
羈艱暫愉悅，羸老反惆悵。中原未解兵，吾得終踈放。

登白馬潭

水生春纜沒，日出野船開。宿鳥行猶去，叢花笑不來。  
人人傷白首，處處接金盃。莫道新知要，南征且未廻。

歸鴈

聞道今春鴈，南歸自廣州。見花辭漲海，避雪到羅浮。  
是物關兵氣，何時免客愁。年年霜露隔，不迺五湖秋。

野望

納納乾坤大，行行郡國遙。雲山兼五嶺，風壤帶三苗。  
野樹侵江闊，春蒲長雪消。扁舟空老去，無補聖明朝。  
入喬口長沙北界

漠漠舊京遠，遲遲歸路賒。殘年傍水國，落日對春華。  
樹蜜早蜂亂，江泥輕燕斜。賈生骨已朽，悽惻近長沙。

銅官渚守風

不夜楚帆落，避風湘渚間。水耕先浸草，野火更燒山。

早泊雲物晦、逆行波浪慳、飛來雙白鶴、過去香難攀。

北風

春生南國瘴氣待北風、蘇向晚靈殘日、初雷鼓大鑪、  
爽携卑濕地、聲拔洞庭湖、萬里魚龍伏、三更鳥獸呼、  
滌除貪破浪、愁絕付摧枯、執熱沉沉在、凌寒往往須、  
且知寬疾肺、不敢恨危塗、再宿煩舟子、衰容問僕夫、  
今晨非盛怒、便道即長驅、隱几看帆席、雲山湧坐隅。

雙楓浦

輟棹青楓浦、雙楓舊已摧、自驚衰謝力、不道棟梁材、  
浪足浮紗帽、皮須截錦苔、江邊地有主、暫借上天迴。

望嶽

南嶽配朱鳥、秩禮自百王、歛吸領地靈、頌洞半炎方、  
邦家用祀典、在德非馨香、巡狩何寂寥、有虞今則亡、  
洎吾隘世網、行邁越瀟湘、渴日絕壁出、漾舟清光旁、  
祝融五峯尊、峰峰次低昂、紫蓋獨不朝、爭長喋相望、  
恭聞魏夫人、羣仙來翱翔、有時五峯氣、散風如飛霜、  
牽迫恨脩途、未暇伏崇崗、歸來覬命駕、沐浴休玉堂、  
三歎問府主、曷以贊我皇、牲璧忍衰俗、神其思降祥。

二月至潭州所作

小寒食舟中作

佳辰強飲食猶寒隱几蕭條戴鶻冠春水船如天上  
坐老年花似霧中看娟娟戲蝶過間幔片片輕鷗下  
急湍雲白山青萬餘里愁看直北是長安

清明二首

朝來新火起新烟湖色春光淨客船繡羽衝花他自  
得紅顏騎竹我無緣胡童結束還難有楚女腰支亦  
可憐不見定王城舊處長懷賈傅井依然虛霑周舉  
為寒食實藉君平賣卜錢鍾鼎山林各天性濁醪麤  
飯任吾年

此身飄泊苦西東右臂偏枯半耳聾寂寂繫舟雙下

淚悠悠伏枕左書空十年蹴踘將雛遠萬里鞦韆習  
俗同旅鴈上雲歸紫塞家人鑽火用青楓秦城樓閣  
烟花裏漢主山河錦繡中風水春來洞庭闊白蘋愁  
殺白頭翁

風雨看舟前落花戲爲新句

江上人家桃樹枝春寒細雨出疎籬影遭碧水潛勾  
引風妬紅花却倒吹吹花困癩旁舟楫水光風力俱  
相怯赤憎輕薄遮入懷珍重分明不來接濕久飛遲  
半欲高縈沙惹草細於毛蜜蜂胡蝶生情性偷眼蜻  
蜓避百勞

岳麓山道林二寺行

玉泉之南麓山殊道林林壑爭盤紆寺門高開洞庭  
野殿脚挿入赤沙湖五月寒風冷佛骨六時天樂朝  
香爐地靈步步雪山草僧寶人人滄海珠塔劫宮墻  
壯麗敵香厨松道清涼俱蓮花交響共命鳥金榜雙  
廻三足鳥方丈涉海費時節玄圃尋河知有無暮年  
且喜經行近春日兼蒙暄暖扶飄然斑白身奚適旁  
此烟霞茅可誅桃源人家易制度橘洲田土仍膏腴  
潭府邑中甚淳古太守庭內不喧呼昔遭衰世皆晦  
迹今幸樂國養微軀依止老宿亦未晚富貴功名不

足圖父爲野客尋幽慣細學何顛免興孤一重一  
吾肺腑山鳥山花吾友于宋公放逐曾題壁物色分  
留與老夫

客從

客從南溟來遺我泉客珠珠中有隱字欲辨不成書  
緘之篋笥久以俟公家須開視化爲血哀今徵歛無

絕句六首

日出籬東水雲生舍北泥竹高鳴翡翠沙僻舞鷓鴣

又

鶯鶯花藥亂飛飛蜂蝶多幽棲身懶動客至欲如何

又  
鑿井交樓葉開渠斷竹根扁舟輕棹纜小徑曲通村

又  
急雨梢溪足斜暉轉樹腰隔巢黃鳥並翻藻白魚跳

又  
舍下笋穿壁庭中藤刺簷地晴絲冉冉江白草纖纖

又  
江動月移石溪虛雲傍花鳥棲知故道帆過宿誰家

奉酬寇十侍御錫見寄四韻復寄寇

往別郇瑕地于今四十年來簪御府筆故泊洞庭船

詩憶傷心處春深把臂前南瞻按百越黃帽待君偏

上巳日徐司錄林園宴集

鬢毛垂領白花藥亞枝紅欹倒衰年廢招尋令節同  
薄衣臨積水吹面受和風有喜留攀桂無勞問轉蓬

江南逢李龜年

岐王宅裏尋常見崔九堂前幾度聞正是江南好風  
景落花時節又逢君

湘江宴餞裴二端公赴道州

白日照舟師朱旗散廣川羣公餞南伯肅肅秩初筵  
鄙人奉末眷佩服自早年義均骨肉地懷抱罄所宣

盛名富事業、無取愧高賢、不以喪亂嬰、保愛金石堅、  
計拙百寮下、氣蘇君子前、會合苦不久、哀樂本相纏、  
交遊颯向盡、宿昔浩茫然、促觴激萬慮、掩抑淚潺湲、  
熱雲集曛黑、缺月未生天、白團爲我破、華燭蟠長煙、  
鵠鷗催明星、解袂從此旋、上請減兵甲、下請安井田、  
永念病渴老、附書遠山巔、

寄李十四員外布十二韻新除司議郎萬州

別駕雖尚伏枕已聞理裝

名參漢望苑、職述景題輿、巫峽將之郡、荆門好附書、  
遠行無自苦、內熱比何如、正是炎天闊、那堪野館踈、

黃牛平駕浪、畫鷁上凌虛、試待盤渦歇、方期解纜初、  
悶能過小徑、自爲摘嘉蔬、渚柳元幽僻、村花不掃除、  
宿陰繁素捺、過雨亂紅蕖、寂寂夏先晚、泠泠風有餘、  
江清心可瑩、竹冷髮堪梳、直作移巾几、秋帆發敝廬、  
江閣卧病走筆寄呈崔盧兩侍御

客子庖厨薄、江樓枕席清、衰年病祗瘦、長夏想爲情、  
滑憶彫胡飯、香聞錦帶羹、溜匙兼暖腹、誰欲致盃甕、

潭州送韋員外牧韶州

炎海韶州牧、風流漢署郎、分符先令望、同舍有輝光、  
白首多年疾、秋天昨夜涼、洞庭無過鴈、書疏莫相忘、



潭州留別杜員外院長

韋迢

江畔長沙驛相逢纜客船大名詩獨步小郡海西  
偏地濕愁飛鵬天炎畏跼鷺去留俱失意把臂共  
潸然

江閣對雨有懷行營裴二端公

南紀風濤壯陰晴屢不分野流行地日江入度山雲  
層閣憑雷殷長空面水文雨來銅柱北應洗伏波軍

早發湘潭寄杜員外院長

韋迢

北風昨夜雨江上早來涼楚岫千峯翠湘潭一葉  
黃故人湖外客白首尚為郎相憶無南鴈何時有

報章

酬韋韶州見寄

養拙江湖外朝廷記憶疎深慙長者轍重得故人書  
白髮絲難理新詩錦不如雖無南過鴈看取北來魚

杜工部集卷第四十六

杜工部集卷第四十七

大曆四年秋至潭州所作

千秋節有感二首

自罷千秋節頻傷八月來先朝常宴會壯觀已塵埃  
鳳紀編生日龍池塹劫灰湘川新涕淚秦樹遠樓臺  
寶鏡羣臣得金吾萬國迴衢樽不重飲白首獨餘哀

又

御氣雲樓敞含風綵仗高仙人張內樂王母獻宮桃  
羅襪紅蕖艷金羈白雪毛舞階銜壽酒走索背秋毫  
聖主他年貴邊心此日勞桂江流向北蒲眼送波濤

晚秋長沙蔡五侍御飲筵送殷六參軍歸澧

州覲省

佳士欣相識，慈顏望遠遊。甘從投轄飲，肯作置書郵。  
高鳥黃雲暮，寒蟬碧樹秋。湖南冬不雪，吾病得淹留。

湖南送敬十使君適廣陵

相見各頭白，其如離別何。幾年一會面，今日復悲歌。  
少壯樂難得，歲寒心匪他。氣纏霜匣滿，冰置玉壺多。  
遭亂實漂泊，濟時曾琢磨。形容吾較老，膽力爾誰過。  
秋晚嶽增翠，風高湖湧波。騫騰訪知己，淮海莫蹉跎。

長沙送李十一銜

與子避地西康州，洞庭相逢十二秋。遠矚尚方曾賜  
履，竟非吾土倦登樓。久存膠漆應難並，一辱泥塗遂  
晚收。李杜齊名真忝竊，朔雲寒菊倍離憂。

奉贈盧五丈參謀琚

恭惟同自出，妙選異高標。入幕知孫楚，披襟得鄭儵。  
文人藉才地，門閥冠雲霄。老矣逢迎拙，相於契託饒。  
賜錢傾府待，爭米駐船遙。鄰好艱難薄，氓心杼軸焦。  
客星空伴使，寒水不成潮。素髮乾垂領，銀章破在腰。  
說詩能累夜，醉酒或連朝。藻翰惟牽率，湖山合動搖。  
時清非造次，興盡却蕭條。天子多恩澤，蒼生轉寂寥。

休傳鹿是馬莫信鵬如鴉未解依依袂還斟泛泛瓢  
流年疲蟋蟀體物幸鷓鴣孤負滄洲願誰云晚見招

登舟將適漢陽

春宅棄汝去秋帆催客歸庭蔬尚在眼浦浪已吹衣  
生理飄蕩拙有心遲暮遠中原戎馬盛遠道素書稀  
塞鴈與時集檣烏終歲飛鹿門自此往永息漢陰機

重送劉十弟判官

分源承帝派別浦鴈賓秋年事推兄忝人才覺弟優  
經過辨艷劔意氣逐吳鉤垂翅徒衰老先鞭不滯留  
本枝凌歲晚高義豁窮愁他日臨江待長沙舊驛樓

暮秋將歸秦留別湖南幕府親友

水闊蒼梧野天高白帝秋途窮那免哭身老不禁愁  
太府才能會諸公德業優北歸衝雨雪誰憫弊貂裘

送盧十四弟侍御護韋尚書靈襯歸上都二

十韻

素幕渡江遠朱幡登陸微悲鳴駟馬顧失涕萬人揮  
叅佐哭辭畢門闌誰送歸從公伏事久之子俊才稀  
長路更執紼此心猶倒衣感恩義不小懷舊禮無違  
墓待龍驤詔臺迎獬豸威深衷見士則雅論在兵機  
戎狄乘妖氣塵沙落禁闈往年朝謁斷他日掃除非

但促銅壺箭，休添玉帳旂。動詢黃閣老，肯慮白登園。  
萬姓瘡痍合，羣兇嗜慾肥。刺規多諫諍，端拱自光輝。  
儉約前王體，風流後代希。對敷期特達，衰朽再芳菲。  
空裏愁書字，山中疾採薇。撥盃要忽罷，抱被宿何依。  
眼冷看征蓋，兒扶立釣磯。清霜洞庭葉，故就別時飛。

暮秋枉裴道州手札率爾遣興寄迺呈蘇渙  
侍御

久客多在友朋書，素書一月凡一束。虛名但蒙寒溫  
問，泛愛不救溝壑辱。齒落未是無心人，舌存耻作窮  
途哭。道州手札適復至，紙長要自三過讀。盈把那須

滄海珠入懷，本倚崑山玉。撥弄潭州百斛酒，蕪沒瀟  
岸千株菊。使我晝立煩兒孫，令我夜坐費燈燭。憶子  
初尉永嘉去，紅顏白面花映肉。軍符侯印取豈遲，紫  
燕綠耳行甚速。聖朝尚飛戰鬪塵，濟世宜引英俊入。  
黎元愁痛會蘇息，夷狄跋扈徒逡巡。授鉞築壇聞意  
旨，頽網漏網期彌綸。郭欽上書見大計，劉毅答詔驚  
羣臣。他日更僕語不淺，明公論兵氣益振。傾壺蕭管  
黑白髮，舞劍霜雪吹青春。宴筵曾語蘇季子，後來傑  
出雲孫比。茅齋定王城，郭門藥物楚老漁。商市市北  
肩輿每聯袂，郭南抱甕亦隱几。無數將軍西第成，早

作丞相東山起鳥雀苦肥秋粟菽蛟龍欲蟄寒沙水  
天下鼓角何時休陣前部曲終日死附書與裴同示  
蘇此生已媿須人扶致君堯舜付公等早據要路思  
捐軀

奉贈李八丈判官曠

我丈時英特宗枝神堯後珊瑚市則無駉驥人得有  
早年見標格秀氣衝星斗事業富清機官曹貞獨守  
頃來樹嘉政皆已傳衆口艱難體貴安冗長吾敢取  
區區猶歷試炯炯更持久討論實解頤操割紛應手  
篋書積諷諫宮闕限奔走入幕未展材秉鈞孰爲偶  
所親問淹泊况愛惜衰朽垂白辭南翁委身希北叟  
真成窮轍鮒或似喪家狗秋枯洞庭石風颯長沙柳  
高興激荆衡知音爲回首

奉寄河南常尹丈人甫弊廬在偃師承常公  
頻有訪問故有下句

有客傳河尹逢人問孔融青囊仍隱逸章甫尚西東  
鼎食爲門戶詞場繼國風尊榮瞻地絕踈放憶途窮  
濁酒尋陶令丹砂訪葛洪江湖漂短褐霜雪滿飛蓬  
牢落乾坤大周流道術空謬慙知薊子真怯笑揚雄  
盤錯神明懼謳歌德義豐尸鄉餘土室難說祝雞翁

別董頴

窮冬急風水逆浪開帆難士子甘旨闕不知道里寒  
有求彼樂土南適小長安別我舟楫去覺君衣裳單  
素聞趙公節兼盡賓主歡已結門廬望無令霜雪殘  
老夫亦解纜脫粟朝未餐飄蕩兵甲際幾時懷抱寬  
漢陽頗寧靜峴首試考槃當念著阜帽采薇青雲端  
奉送魏六丈佑少府之交廣

賢豪贊經綸功成名空垂子孫耀不振歷代皆有之  
鄭公四葉孫長大常苦飢衆中見毛骨猶是麒麟兒  
磊落貞觀事致君樸直辭家聲蓋六合行色何其微  
遇我蒼梧野忽驚會面稀議論有餘地公侯來未遲  
虛思黃金貴自笑青雲期長卿久病渴武帝元同時  
季子黑貂弊得無妻嫂欺尚爲諸侯客獨屈州縣卑  
南遊交海甸浩蕩從此辭窮途伏神道世亂輕土宜  
解帆歲云暮可與春風歸出入朱門家華屋刻蛟螭  
玉食亞王者樂張游子悲侍婢艷傾城綃綺輕霧霏  
掌中琥珀鍾行酒雙遠迤新歡繼明燭梁棟星辰飛  
兩情顧眄合珠碧贈於斯上貴見肝膽下貴不相疑  
心事披寫間氣酣達所爲錯揮鐵如意莫避珊瑚枝  
始兼逸邁興終慎賓主儀戎馬闔天宇嗚呼生別離

別張十三建封湖南觀察使章之進辟參謀  
嘗讀唐實錄國家草昧初劉裴首建議龍見尚躊躇  
秦王撥亂安一劔揔兵符汾晉爲豐沛暴隋竟滌除  
宗臣則廟食後嗣何踈蕪彭城英雄種宜膺將相圖  
爾惟外曾孫倜儻汗血駒眼中萬少年用意盡崎嶇  
相逢長沙亭乍問緒業餘乃吾故人子童叟聯居諸  
揮手灑衰淚仰看八尺軀內外名家流風神蕩江湖  
范雲堪結交嵇紹自不孤擇材征南幕湖落回鯨魚  
載感賈生慟復聞樂毅書主憂急盜賊師老荒京都  
舊丘復稅駕大厦傾宜扶君臣各有分管葛本時源  
雖當霰雪嚴未覺枯栢枯高義在雲臺嘶鳴望天衢  
羽人掃碧海功業竟何如

舟中夜雪有懷盧十四侍御弟

朔風吹桂水大雪夜紛紛暗度南樓月寒深北渚雲  
燭斜初近見舟重竟無聞不識山陰道聽雞更憶君

對雪

北雪犯長沙胡雲冷萬家隨風且間葉帶雨不成花  
金錯囊垂罄銀壺酒易賒無人竭浮蟻有待至昏鴉

杜工部集卷第四十七



杜工部集卷第四十八  
大曆四年冬至潭州所作

冬晚送長孫漸舍人歸州

參卿休坐幄，蕩子不還鄉。  
南客瀟湘外，西戎鄠杜傍。  
衰年傾蓋晚，費日繫舟長。  
會面思來札，銷魂逐去檣。  
雲晴鷗更舞，風逆鴈無行。  
匣裏雌雄劍，吹毛任選將。

暮冬送蘇四郎僕兵曹適桂州

飄飄蘇季子，六印佩何遲。  
早作諸侯客，兼工古體詩。  
爾賢埋照久，余病長年悲。  
盧綰須征日，樓蘭要斬時。

歲陽初盛動王化久磷緇爲入蒼梧廟看雲哭九疑  
風疾舟中伏枕書懷三十六韻奉呈湘南親友

軒轅休製律虞舜罷彈琴尚錯雄鳴管猶傷半死心  
聖賢名古邈羈旅病年侵舟泊常依震湖平早見參  
如聞馬融笛若倚仲宣襟故國悲寒望羣雲慘歲陰  
水鄉霾白蜃楓岸疊青岑鬱鬱冬炎瘴濛濛雨滯淫  
鼓迎方祭鬼彈落似鴉禽興盡纔無悶愁來遽不禁  
生涯相汨沒時物自蕭森疑惑樽中弩淹留冠上簪  
牽裾驚魏帝投閣爲劉歆狂走終奚適微才謝所欽

吾安藜不糝女貴玉爲琛烏几重重縛鷄衣寸寸針  
哀傷同庾信述作異陳琳十暑岷山葛三霜楚戶砧  
叨陪錦帳坐久放白頭吟反撲時難遇忘機陸易沉  
應過數粒食得近四知金春草封歸恨源花費獨尋  
轉蓬憂悄悄行樂病泔泔瘞天追潘岳持危覓鄧林  
蹉跎翻學步感激在知音却假蘇張舌高談周宋鐔  
納流迷浩汗峻址得嵌崟城府開清旭松筠起碧潯  
披顏爭倩倩逸足競駸駸朗鑑存愚直皇天實照臨  
公孫仍恃險侯景未生擒書信中原闊干戈北斗深  
畏人千里井問俗九州箴戰血流依舊軍聲動至今

葛洪尸定解許靖力還任家事丹砂訣無成涕作霖

幽人

孤雲亦羣遊神物有所歸麟鳳在赤霄何當一來儀  
往與惠詢輩中年滄洲期天高無消息棄我忽若遺  
內懼非道流幽人在瑕疵洪濤隱笑語鼓枻蓬萊池  
崔嵬扶桑日照耀珊瑚枝風帆倚翠蓋暮把東皇衣  
嚙漱元和津所思烟霞微知名未足稱局促南山芝  
五湖復浩蕩歲暮有餘悲

大曆五年庚戌在潭州所作

奉贈蕭二十使君

昔在嚴公幕俱爲蜀使臣艱危參大府前後間清塵  
起草鳴先路乘槎動要津王鳧聊暫出蕭雉只相馴  
終始任安義荒蕪孟母鄰聯翩富禮意氣死生親  
張老存家事嵇康有故人食恩慙鹵莽鏤骨抱酸辛  
巢許山林志夔龍廊廟珍鵬圖仍矯翼熊軾且移輪  
磊落衣冠地蒼茫土木身墳荒鳴自合金石瑩逾新  
重憶羅江外同遊錦水濱結歡隨過隙懷舊憶霑中  
曠絕含香舍稽留伏枕辰停驂雙闕早迴鴈五湖春  
不達長卿病從來原憲貧監河受貸粟一起轍中鱗

奉送二十三舅錄事之攝郴州

賢良歸盛族，吾舅盡知名。徐庶高交友，劉牢出外甥。  
泥塗豈珠玉，環堵但柴荆。衰老悲人世，驅馳厭甲兵。  
氣春江上別，淚血渭陽情。舟鷁排風影，林烏反哺聲。  
永嘉多北至，勾漏且南征。必見公侯復，終聞盜賊平。  
郴州頗涼冷，橘井尚凄清。從役何蠻貊，居官志在行。

送魏二十四司直充嶺南掌選崔郎中判官

兼寄韋韶州

選曹分五嶺，使者歷三湘。才美膺推薦，君行佐紀綱。  
佳聲期共遠，雅節在周防。明白山濤鑒，嫌疑陸賈裝。  
故人湖外少，春日嶺南長。憑報韶州牧，新詩昨寄將。

送趙十七明府之縣

連城爲寶重，茂宰得才新。山雉迎舟揖，江花報邑人。  
論文翻恨晚，卧病却愁春。惠愛南翁悅，餘波及老身。

入日寄杜二拾遺

蜀州刺史高適

入日題詩寄草堂，遙憐故人思故鄉。柳條弄色不  
忍見，梅花滿枝空斷腸。身在南蕃無所預，心懷百  
憂復千慮。今年入日空相憶，明年入日知何處。  
一卧東山三十春，豈知書劔老風塵。龍鍾還忝二千  
石，愧爾東西南北人。

追酬故高蜀州人日見寄并序

開文書帙中檢所遺忘因得故高常侍適往居在  
成都時高任蜀州刺史人日相憶見寄詩淚灑行  
間讀終篇末自枉詩已十餘年莫記存沒又六七  
年矣老病懷舊生意可知今海內忘形故人獨漢  
中王瑀與昭州敬使君超先在愛而不見情見乎  
辭大曆五年正月二十一日却追酬高公此作因  
寄王及敬弟

自蒙蜀州人日作不意清詩久零落今晨散帙眼忽  
開送淚幽吟事如昨嗚呼壯士多慷慨合沓高名動  
寥廓歎我悽悽求友篇感時鬱鬱佳君畧錦里春光  
空爛熳瑤墀侍臣已冥冥瀟湘水國旁鼉鼉鄂杜秋  
天失鷗鷺東西南北更堪論白首扁舟病獨存遙拱北辰  
纏寇盜欲傾東海洗乾坤邊塞西蕃最充斥衣冠南渡多  
崩奔鼓瑟至今悲帝子曳裾何處覓王門文章曹植波瀾  
濶服食劉安德業尊長笛誰能亂愁思昭州詞翰與招魂

蘇大侍御訪江浦賦八韻記異

并序

蘇大侍御渙靜者也旅于江側凡是不交州府之  
客人事都絕久矣肩輿江浦忽訪老夫舟楫而已  
茶酒內余請誦近詩肯吟數首才力素壯詞句動  
人接對明日憶其湧思雷出書篋几杖之外殷殷

留金石聲賦八韻記異亦記老夫傾倒於蘇至矣  
龐公不浪出蘇氏今有之再聞誦新作突過黃初詩  
乾坤幾反覆揚馬宜同時今晨清鏡中勝食齋房芝  
余髮喜却變白間生黑絲昨夜舟火滅湘娥簾外悲  
百靈未敢散風破寒江遲

送重表姪王砮評事使南海

我之曾老姑爾之高祖母爾祖未顯時歸為尚書婦  
隋朝大業末房杜俱交友長者來在門荒年自餬口  
家貧無供給客位但箕箒俄頃羞頗珍寂寥人散後  
入恠鬢髮空吁嗟為之久自陳翦髻鬢鬻市充杯酒

上云天下亂宜與英俊厚向竊窺數公經綸亦俱有  
次問最少年虬髯十八九子等成大名皆因此人手  
下云風雲合龍虎一吟吼願展丈夫雄得辭兒女醜  
秦王時在坐真氣驚戶牖及乎貞觀初尚書踐台斗  
夫人常肩輿上殿稱萬壽六宮師柔順法則化妃后  
至尊均嫂叔盛事垂不朽鳳雛無凡毛五色非爾曹  
往者胡作逆乾坤沸嗷嗷吾客在馮翊爾家同遁逃  
爭奪至徒步塊獨委蓬蒿迢遞熱爾腸十里却呼號  
自下所騎馬右持腰間刀左牽紫遊韁飛走使我高  
苟活到今日寸心銘佩牢亂離又聚散宿昔恨滔滔

水花笑白首春草隨青袍廷評近要津  
節制收英髦北驅漢陽傳南帆上瀧  
舫家聲肯墜地利器當秋毫  
番禺親賢領籌運神功操大夫出  
盧宋寶貝休脂膏洞主降接武海  
胡舶千艘我欲就丹砂跋涉覺身  
勞安能陷糞土有志乘鯨鼇或  
駭鸞騰天聊作鶴鳴皋

發潭州

夜醉長沙酒曉行湘水春岸花飛送  
客檣燕語留人賈傅才何有褚公  
書絕倫名高前後事回首一傷神

燕子來舟中作

湖南爲客動經春燕子銜泥兩度  
新舊入故園嘗識主如今社日遠  
看人可憐處處巢居室何異飄飄  
託此身暫語船檣還起去穿花落  
水益霑巾

上水遣懷

我衰太平時身病戎馬後蹭蹬多拙  
爲安得不皓首驅馳四海內童穉  
日糊口但遇新少年少逢舊親友  
低顏下色地故人知善誘後生血  
氣豪舉動見老醜窮迫挫曩懷常  
如風中走一紀出西蜀于今向南  
斗孤舟亂春華暮齒依蒲柳冥冥  
九疑葬聖者骨已朽蹉跎陶唐人  
鞭撻日月久中間屈賈輩讒毀竟  
自取鬱沒二悲冤蕭條猶在否首  
萃清湘石逆行雜林藪

篙工密逞巧氣若酣盃酒  
訶謳互激遠回斡明受授  
善知應觸類各藉脫穎手  
古來經濟才何事罕獨有  
蒼蒼衆色晚熊挂玄蛇吼  
黃羆在樹顛正爲羣虎守  
羸骸將何適履險顏益厚  
庶與達者論吞聲混瑕垢  
同豆盧峯貽主客李貞外  
賢子斐知字韻  
鍊金歐冶子噴玉大宛兒  
符彩高無敵聰明達所爲  
夢蘭他日應折桂早年知  
爛熳通經術光芒刷羽儀  
謝庭瞻不遠潘省會於斯  
唱和將離曲田翁號鹿皮  
人生貴是男丈夫重天機  
未達善一身得志行所爲

詠懷二首

嗟余竟輒軻將老逢艱危  
胡離逼神器逆節同所歸  
河洛化爲血公卿草間啼  
西京復陷沒翠蓋蒙塵飛  
萬姓悲赤子兩宮棄紫微  
倏忽向二紀姦雄多是非  
本朝再樹立未及貞觀時  
日給在軍儲上官督有司  
高賢迫形勢豈暇相扶持  
疲苾苟懷策棲屑無所施  
先王實罪已愁痛正爲茲  
歲月不我與蹉跎病於斯  
夜看鄴城氣回首蛟龍池  
齒髮已自料意深陳苦辭

又

邦危壞法則聖遠益愁慕  
飄飄桂水遊悵望蒼梧暮  
潛魚不銜鈎走鹿無反顧  
皦皦幽曠心拳拳異平素



衣食相拘閔朋知限流寓風濤上春沙十里浸江樹  
逆行少吉日時節立復度井竈任塵埃舟航煩數具  
牽纏加老病瑣細隘俗務萬古一死生胡爲足名數  
多憂汙桃源拙計泥銅柱未辭炎瘴毒襪落跋涉懼  
虎狼窺中原焉得所歷住葛洪及許靖避世常此路  
賢愚誠等差自愛各馳騫羸瘠且如何魄奪針灸屢  
擁滯僮僕慵稽留篙師怒終當挂帆席天意難告訴  
南爲祝融客勉彊親杖履結託老人星羅浮展衰步

杜工部集卷第四十八

杜工部集卷第四十九

至衡州所作

杜員外兄垂示詩因作此寄上 郭受

新詩海內流傳困舊德朝中屬望勞郡邑地卑饒  
霧雨江湖天闊足風濤松醪酒熟旁看醉蓮葉舟  
輕自學操春興不知凡幾首衡陽紙價頓能高

酬郭十五判官

才微歲老尚虛名卧病江湖春復生藥裹關心詩總  
廢花枝照眼句還成只同燕石能星隕自得隨珠覺  
夜明喬口橘洲風浪促繫帆何惜片時程

歸鴈二首

萬里衡陽鴈今年又北歸  
雙雙瞻客上一一背人飛  
雲裏相呼疾沙邊自宿稀  
繫書無浪語愁寂故山薇

又

欲雪違胡地先花別楚雲  
却過清渭影高起洞庭羣  
塞北春陰暮江南日色曛  
傷弓流落羽行斷不堪聞

白鳧行

君不見黃鵠高於五尺童  
化為白鳧似老翁故畦遺  
穗已蕩盡天寒歲暮波濤中  
鱗介腥膻素不食終日

忍飢西復東魯門鷄鷓亦蹭蹬  
聞道如今猶避風

朱鳳行

君不見瀟湘之山衡山高山巔  
朱鳳聲嗷嗷側身長  
顧求其曹翅垂口噤心甚勞  
下愍百鳥在羅網黃雀  
最小猶難逃願分竹實及螻蟻  
盡使鷓臬相怒號

衡州送李大夫赴廣州

斧鉞下青冥樓船過洞庭  
北風隨爽氣南斗避文星  
日月籠中鳥乾坤水上萍  
王孫文人行垂老見飄零  
三月自衡州暫往潭州

旅夜書懷

細草微風岸危檣獨夜舟星垂平野闊月湧大江流  
名豈文章著官應老病休飄飄何所似天地一沙鷗

清明

着處繁華矜是日長沙千人萬人出渡頭翠柳豔明  
眉爭道朱蹄驕嚙膝此都好遊湘西寺諸將亦自軍  
中至馬援征行在眼前葛強親近同心事金鎧下山  
紅粉晚牙檣挨施青樓遠古時喪亂皆可知人世悲  
歡暫相遣弟姪雖存不得書干戈未息苦離居逢迎  
少壯非吾道况乃今朝更被除

題衡山縣文宣王廟新學堂呈陸宰

旄頭彗紫微無復俎豆事金甲相排蕩青衿一憔悴  
嗚呼已十年儒服弊于地征夫不遑息學者淪素志  
我行洞庭野歛得文翁肆泮泮胄子行若舞風雩至  
周室宜中興孔門未應弃是以資雅才渙然立新意  
衡山雖小邑首唱恢大義因見縣尹心根源舊宮闕  
講堂非曩構大屋加塗墍下可容萬人墻隅亦深邃  
何必三千徒始壓戎馬氣林木在庭戶密榦疊蒼翠  
有井朱夏時轆轤凍堦祀耳聞讀書聲殺伐災髣髴  
故國延歸望衰顏減愁思南紀波瀾西河共風味  
采詩倦跋涉載筆尚可記高歌激宇宙九百慎失墜

入衡州

兵革自久遠興衰看帝王漢儀甚照耀胡馬何猖狂  
老將一失律清邊生戰場君臣忍瑕垢河岳空金湯  
重鎮如割據權輕絕紀綱軍州體不一寬猛性所將  
嗟彼苦節士素於圓鑿方寡妻從爲郡兀者安短牆  
凋弊惜邦本哀矜存事常旌麾非其任府庫實過防  
怨已獨在此多憂增內傷偏裨限酒肉卒伍單衣裳  
元惡疑是似聚謀洩康莊竟流帳下血大降湖南殃  
烈火發中夜高煙燄上蒼至今分粟帛殺氣吹沅湘  
福善理顛倒明徵大莽茫銷魂避飛鏑累足穿豺狼  
隱忍枳棘刺遷延胼胝瘡遠歸兒侍側猶乳女在旁  
又客幸脫免暮年慙激昂蕭條向水陸汨沒隨漁商  
報主身已老入朝病見妨悠悠委薄俗鬱鬱回剛腸  
叅錯走洲渚春容轉林篁片帆在柳岸通郭前衡陽  
華表雲鳥埤名園花草香旗亭壯邑屋烽檣蟠城隍  
中有古刺史盛才冠巖廊扶顛待柱石獨坐飛風霜  
昨者間瓊樹高談隨羽觴無論再繾綣已是安蒼黃  
劇孟七國畏馬卿四賦良門闌蘇生在勇銳白起強  
問罪富形勢凱歌懸否臧氛埃期必掃蚊蚋焉能當  
橘井舊地宅仙山引舟航此行厭暑雨厥土聞清涼

諸舅剖符近、開緘書札光、頻繁命屢及、磊落字百行、  
江揔外家養、謝安乘興長、下流匪珠玉、擇木羞鸞凰、  
我師嵇叔夜、世賢張子房、柴荆寄樂土、鵬路觀翱翔、  
白馬

廻棹

白馬東北來、空鞍貫雙箭、可憐馬上郎、意氣今誰見、  
近時主將戮、中夜商於戰、喪亂死多門、嗚呼淚如霰、  
宿昔試安命、自私猶畏天、勞生繫一物、爲客費多年、  
衡嶽江湖大、蒸池疫癘偏、散才嬰薄浴、有跡負前賢、  
中拂那關眼、瓶罍易滿船、火雲滋垢膩、凍雨衰沉綿、  
強飯蓴添滑、端居茗續煎、清思漢水上、涼憶峴山巔、  
順浪翻堪倚、廻帆又省牽、吾家碑不昧、王氏井依然、  
几杖將衰齒、茅茨寄短椽、灌園曾取適、遊寺可終焉、  
遂性同漁父、成功異魯連、篙師煩爾送、朱夏及寒泉、

憶鄭南

鄭南伏毒寺、瀟灑到江心、石影銜誅閣、泉聲帶玉琴、  
風杉曾曙倚、雲嶠憶春臨、萬里滄浪水、龍蛇只自深、  
舟中苦熱遣懷、奉呈陽中丞通簡臺省諸公、  
媿爲湖外客、看此戎馬亂、中夜混黎甍、脫身亦奔竄、  
平生方寸心、反當帳下難、嗚呼殺賢良、不叱白刃散、

吾非文人特沒齒埋冰炭耻以風病辭胡然泊湘岸  
入舟雖苦熱垢膩可澆灌痛彼道邊人形骸改昏旦  
中丞連帥職封內權得按身當問罪先縣實諸侯半  
士卒既輯睦啓行促精悍我聞上游兵稍逼長沙館  
鄰好彼克修天機自明斷南圖卷雲水北拱戴霄漢  
美名光史臣長策何壯觀驅馳數公子咸願聞伐叛  
聲節哀有餘夫何激衰懦偏裨表三上鹵莽同一貫  
始謀誰其間廻首增憤惋宗英李端公守職甚昭煥  
變通迫脅地謀畫焉得筭王室不肯微凶徒略無憚  
此流湏卒斬神器資強幹扣寂豁煩襟皇天照嗟嘆

送顧八分文學適洪吉州

中郎石經後八分蓋憔悴顧侯運鑪錘筆力破餘地  
昔在開元中韓蔡同勳願玄宗妙其書是以數子至  
御札早流傳揄揚非造次三人並入直恩澤各不二  
顧於韓蔡內辨眼工小字分日示諸王鉤深法更祕  
文學與我遊蕭疎外聲利追隨二十載浩蕩長安醉  
高歌卿相宅文翰飛省寺視我揚馬間白首不相棄  
驂駟入窮巷必脫黃金轡一論朋友難遲暮敢失墜  
古來事反覆相見橫涕泗嚮者玉珂人誰是青雲器  
才盡傷形體病渴汚官位故舊獨依然危時話顛躓

我甘多病老子負憂世志胡為困衣食顏色少稱遂  
遠作辛苦行順從衆多意舟楫無根蒂蛟鼉好為祟  
况兼水賊繁特戒風颶駭崩騰戎馬際徃徃殺長吏  
子干東諸侯勤勉防縱恣邦以民為本魚飢費香餌  
請哀瘡痍深告訴皇華使使臣精所擇進德知歷試  
惻隱誅求情固應賢愚異烈士惡苟得俊傑思自致  
贈子猛虎行出郊載酸鼻

聶耒陽以僕阻水書致酒肉療飢荒江詩得代懷  
興盡本韻至縣呈聶令陸路去方田驛四十里舟  
行一日時屬江漲泊于方

耒陽馳尺素見訪荒江渺義士烈女家風流吾賢紹  
昨見狄相孫許公人倫表前期翰林後屈跡縣邑小  
知我礙端濤半旬獲浩漕麾下殺元戎湖邊有飛旄  
孤舟增鬱鬱僻路殊悄悄側驚猿猱捷仰羨鶴鶴矯  
禮過宰肥羊愁當置清醪人非西喻蜀興在北坑趙  
方行柳岸靜未話長沙擾崔師乞已至禮率用矜少  
問罪消息真開顏憇亭沼

杜工部集卷第五十  
逸詩拾遺

瞿塘懷古

西南萬壑注，勅敵兩崖開。  
地與山根裂，江從月窟來。  
削成當白帝，空曲隱陽臺。  
疏鑿功雖美，陶鈞力大哉。

送司馬入京

羣盜至今日，先朝忝從臣。  
歎君能戀主，又客羨歸秦。  
黃閣長司諫，丹墀有故人。  
向來論社稷，為話涕霑巾。  
惜別行送劉僕射



聞道南行市駿馬不限匹數軍中須襄陽幕府天下  
異主將儉省憂艱虞祇收壯健勝鐵甲豈因格鬪求  
龍駒而今西北自反胡騏驎蕩盡一匹無龍媒真種  
在帝都子孫未落西南隅向非戎事備征伐君肯辛  
苦越江湖江湖九馬多顛顛衣冠往往乘蹇驢梁公  
富貴於身踈號令明白人安居俸錢時散士子盡府  
庫不為驕豪虛以茲報主寸心赤氣却西戎回北狄  
羅網羣馬藉馬多氣在驅除出金帛劉侯奉使光推  
擇滔滔才略滄溟窄杜陵老翁秋繫船扶病相識長  
沙驛強梳白髮提胡盧手把菊花路傍摘九州兵革  
浩茫茫三歎聚散臨重陽當狂對客忍流涕不覺老  
夫神內傷

呀鵲行

病鵲孤飛俗眼醜每夜江邊宿衰柳清秋落日已側  
身過鴈歸鷗錯迴首緊腦雄姿迷所向踈翮稀毛不  
可狀彊神迷復阜鵬前俊材早在蒼鷹上風濤颯颯  
寒山陰熊羆欲蟄龍蛇深念爾此時有一擲失聲濺  
血非其心

短歌行贈四兄

與兄行年校一歲賢者是兄愚者弟兄將富貴等浮

雲第竊功名好權勢長安秋雨十日泥我曹韉馬聽  
晨雞公卿朱門未開鎖我曹已到肩相齊吾兄睡穩  
方舒膝不韞不巾踏曉日男啼女哭莫我知身上酒  
繒腹中實今年思我來嘉州嘉州酒重花滿樓樓頭  
喫酒樓下卧長歌短詠還相酬四時八節還拘禮女  
拜弟妻男拜弟幅巾鞶帶不掛身頭脂是垢何曾洗  
吾兄吾兄策許倫一生喜怒長任真日斜枕肘寢已  
熟啾啾唧唧爲何人

右五篇乃蘇州太守裴煜如晦所收見  
舊集補遺

號國夫人

號國夫人承主恩平明上馬入宮門却嫌脂粉澆顏  
色淡掃蛾眉朝至尊

逃難

五十白頭翁南北逃世難踈布纏枯骨奔走苦不暖  
已衰病方入四海一塗炭乾坤萬里內莫見容身畔  
妻孥復隨我回首共悲嘆故國莽丘墟鄰里各分散  
歸路從此迷涕盡湘江岸

寄高適

楚隔乾坤遠難招病客魂詩名惟我共世事與誰論

北關更新主南星落故園定知相見日爛熳倒芳樽  
送靈州李判官

羯胡腥四海回首一茫茫血戰乾坤赤氛迷日月黃  
將軍專策略幕府盛材良近賀中興主神兵動朔方

與嚴二郎奉禮別

別君誰暖眼將老病纏身出涕同斜日臨風看去塵  
商歌還入夜巴俗自爲鄰尚愧微軀在遙聞盛德新  
山東羣盜散關下受降頻諸將歸應盡題書報旅人  
巴西驛亭觀江漲呈竇使君二首

轉驚波作怒即恐岸隨流賴有杯中物還同海上鷗

關心小剡縣傍眼見揚州爲接情人飲朝來減半愁

又

向晚波微綠連空岸脚清日兼春有暮愁與醉無醒  
漂泊猶杯酒躊躇此驛亭相看萬里外同是一浮萍

遣憂

亂離知又甚消息苦難真受諫無今日臨危憶古人  
紛紛乘白馬攘攘著黃巾隋氏留宮室焚燒何太頻

早花

西京安穩未不見一人來臘日巴江曲山花已自開  
盈盈當雪杏艷艷待春梅直苦風塵暗誰憂客鬢催

巴山

巴山遇中使云自陝城來盜賊還奔突乘輿恐未回  
天寒邵伯樹地闊望仙臺狼狽風塵裏羣臣安在哉

收京

復道收京邑兼聞殺犬戎衣冠却扈從車駕已還宮  
尅復誠如此安危在數公莫令回首地慟哭起悲風  
巴西聞收京闕送班司馬入京

聞道收宗廟鳴鑾自陝歸傾都看黃屋正殿引朱衣  
劔外春天遠巴西勅使稀念君經世亂匹馬向王畿  
花底

紫萼扶千藥黃鬚照萬花忽疑行暮雨何事入朝霞  
恐是潘安縣堪留衛玠車深知好顏色莫作委泥沙  
柳邊

只道梅花發那知柳亦新枝枝總到地葉葉自開春  
紫燕時翻翼黃鸝不露身漢南應老盡霸上遠愁人  
送竇九歸成都

文章亦不盡竇子才縱橫非爾更苦節何人符大名  
讀書雲閣觀問綃錦官城我有浣花竹題詩須一行  
贈裴南部聞袁判官自來欲有按問

塵滿萊蕪甑堂橫單父琴人皆知飲水公輩不偷金

梁獄書因上秦臺鏡欲臨獨醒時所嫉羣小謗能深  
即出黃沙在何須白髮侵使君傳舊德已見直繩心  
奉送崔都水翁下峽

無數涪江筏鳴橈揔發時別離終不久宗族忍相遺  
白狗黃牛峽朝雲暮雨祠所過頻問信到日自題詩

題鄴原郭三十二明府茅屋壁

江頭且繫舩爲爾獨相憐雲散灌壇雨春青彭澤田  
頻驚適小國一擬問高天別後巴東路逢人問幾賢  
遣悶戲呈路十九曹長

江浦雷聲喧昨夜春城雨色動微寒黃鸝並坐交愁  
濕白鷺群飛大劇乾晚節漸於詩律細誰家數去酒  
杯寬惟君最愛請狂客百遍相過意未闌

隨章留後新亭會送諸君

新亭有高會行子得良時日動映江幕風鳴掛檻旗  
絕葦終不改勸酒欲無詞已墮峴山淚因題零雨詩

東津送韋諷閩州錄事

聞說江山好憐君吏隱兼寵行舟遠泛惜別酒頻添  
推薦非承乏操持義去嫌他時如按縣不得慢陶潛

客舊館

陳跡隨人事初秋別此亭重來梨葉赤依舊竹林青

風幔何時卷、寒砧昨夜聽、無由出江漢、愁緒日冥冥、  
閩州奉送二十四舅使自京赴任青城

聞道王喬舄名、因太史傳如何碧雞使、把詔紫微天、  
秦嶺愁回馬、涪江醉泛船、青城漫污雜、吾舅意淒然、

愁坐

高齋常見野愁坐、更臨門十月山寒重、孤城是水昏、  
葭萌氏種迥、左檐犬戎存、終日憂奔走、歸期未敢論、

陪鄭公秋晚北池臨眺

北池雲水闊、華館闢秋風、獨鶴先依渚、衰荷且映空、  
采菱寒刺上、踏藕野泥中、素楫分曹往、金盤小徑通、

萋萋露草碧、片片晚旗紅、盃酒霑津吏、衣裳與釣翁、  
異方初艷菊、故里亦高桐、搖落關山思、淹留戰伐功、  
嚴城殊未掩、清宴已知終、何補叅卿事、歡娛到薄躬、

去蜀

五載客蜀郡、一年居梓州、如何關塞阻、轉作瀟湘遊、  
世事已黃髮、殘生隨白鷗、安危大臣在、不必淚長流、

放船

收帆下急水、卷幔逐回灘、江市戎戎暗、山雲泚泚寒、  
荒村無徑入、獨馬恠人看、已泊城樓底、何曾夜色闌、

哭台州鄭司戶蘇少監

故舊誰憐我平生鄭與蘇存亡不重見喪亂獨前途  
豪俊何人在文章掃地無羈遊萬里闊凶問一年俱  
白日中原上清秋大海隅夜臺當北斗泉路宵東吳  
得罪台州去時危棄碩儒移官蓬閣後穀貴沒前夫  
流動嗟何及銜冤有是夫道消詩發興心息酒為徒  
許與才雖薄追隨跡未拘班揚名甚盛嵇阮逸相頊  
會取君臣合寧詮品命殊賢良不必展廊廟偶然趨  
勝決風塵際功安造化鑪從容詢舊學慘淡閱陰符  
擺落嫌疑久哀傷志力輸俗依綿谷異客對雪山孤  
童稚思諸子交情列友于情乖清酒送望絕撫墳呼

瘡病餐巴水瘡瘻老蜀都飄零迷哭處天地日榛蕪

右二十七篇朝奉大夫負安宇所收

送王侍御往東川放生池祖席

東川詩友合此贈怯輕為况復傳宗近空然惜別離  
梅花交近野草色向平池儻憶江邊卧歸期願早知

軍中醉飲寄沈八劉叟

酒渴愛江清餘醑漱晚汀軟莎歌坐穩冷石醉眠醒  
野膳隨行帳華音發從伶數盃君不見都已遣沈冥

惠義寺送王少尹赴成都

苒苒谷中寺娟娟林表峯欄干上處遠結構坐來重

騎馬行春徑衣冠起晚鐘雲門青寂寂此別惜相從  
右三篇見王原叔本

過洞庭湖

蛟室圍青草龍堆隱白沙護堤盤古木迎棹舞神鷗  
破浪南風正回檣畏日斜湖光與天遠直欲泛仙槎  
右一篇見李希聲王直方詩話云得之  
於江心小石刻

送惠二歸故居

惠子白駒瘦歸谿惟病身皇天無老眼空谷值斯人  
崖蜜松花白山杯竹葉新柴門了生事黃綺未稱臣

右一篇見洪駒父詩話劉路左車言嘗  
收得唐人雜編詩冊有之

避地

避地歲時晚竄身筋骨勞詩書遂墻壁奴僕且旌旄  
行在僅聞信此生隨所遭神堯舊天下會見出腥臊  
右一篇見趙次翁本題云至德二載丁

酉作

惠義寺園送辛員外二首

朱櫻此日垂朱實郭外誰家負郭田萬里相逢貪握  
手高才仰望足離筵



雙峯寂寂對春臺萬竹青青照客杯  
細草留連侵坐軟殘花悵望近人開  
同舟昨日何由得並馬今朝未擬迴  
直到綿州始分首江邊樹裏共誰來

長吟

江渚翻鷗戲官橋帶柳陰江飛競渡日  
草見踏青心已撥形骸累真為爛熯深  
賦詩新句穩不覺自長吟

右二篇見卞圖本

絕句三首

聞道巴山裏春盤正好行都將百年興  
一望九江城

又

水檻溫江口茆堂石笋西移船先主廟  
洗藥浣花溪

又

沒道春來好狂風大放顛吹花隨水去  
翻却釣魚船

右三絕句見謝克家任伯本題云得於

真文肅家故書中猶是吳越錢氏時人

所傳格律高妙其為少陵不疑矣

杜工部外集卷之一

酬唱附錄

晦日

太宗文皇帝

晦魄移中律凝暄起麗城  
皁雲朝蓋上穿露曉珠呈  
笑樹花分色啼枝鳥合聲  
披襟觀眺望極目暢春晴

秋日還京陝西十里作

薛稷

驅車越陝郊北顧臨大河  
此行見鄉邑秋風水增波  
西望咸陽塗日暮愛思多  
傳巖旣紆鬱首山亦嗟峨  
操築無昔老采薇有遺歌  
客游節向換人生知幾何

寶劍篇

郭元振

君不見昆吾鐵冶飛炎烟紅光紫氣俱赫然良工鍛  
鍊經幾年鑄作寶劍名龍泉龍泉顏色如霜雪良工  
咨嗟嘆竒絕琉璃匣裏吐蓮花錯鏤金鏤生明月正  
逢天下無風塵幸得用防君子身精光黯黯青蛇色  
文章片片綠龜鱗非直結交遊俠子亦曾親近英雄  
人何言中路遭棄捐零落飄淪古獄邊雖復沉埋無  
所用猶能夜夜氣衝天

一柱觀

張說

舊說江陵觀初疑神化來空中結雲閣綺靡隨風迴

柰何任一柱斯焉容衆材竒功非良世今餘艸露臺

劉郎浦

呂溫

吳蜀成婚此水潯月珠步帳幄黃金誰將一女輕天  
下欲換劉郎鼎祚心

贈草聖張顛

李頎

張公性嗜酒豁達無所營皓首窮艸隸時稱太湖精  
露頂據胡床長叫三五聲興來灑素壁揮筆如流星  
下舍風蕭條寒草滿戶庭問家何所有生事如浮萍  
左手持蟹螯右手執丹經瞪目視霄漢不知醉與醒  
荷葉裹紅魚白甌貯香秬

題懷素臺歌

裴說

我呼古人名鬼神側耳聽杜甫李白與懷素文星酒  
星與草星

登慈恩寺塔

高適

香界泯羣有浮圖豈諸相登臨信孤高披拂欣大壯  
言是羽翼生迥出虛空上頓疑身世別乃覺形神王  
宮闕望戶前山河盡瞻向秋風昨夜至秦塞多清曠  
千里何蒼蒼五陵鬱相望盛時慙阮步末宦知周防  
輸効獨無用斯焉可遊放

同前

岑參

塔勢如涌出孤高聳天宮登臨出世界踏道盤虛空  
突兀壓神州崢嶸如鬼功四角礙白日七層摩蒼空  
下窺指高鳥俯聽聞驚風連山若波濤奔湊似朝宗  
青槐夾馳道宮館何玲瓏秋色從西東蒼然靄關中  
五陵比原上萬古青濛濛淨理了可悟勝因風所宗  
誓將掛冠去學道資無窮

同前

儲光羲

金祠起真宇直上青雲垂地靜我亦閑登之清秋時  
蒼蒼宜春苑片碧昆明池誰云天漢高逍遙方在茲  
靈形賓太極攜手行翠微雷雨旁杳冥鬼神中躩踞

靈變在倏忽莫能窮天涯冠上閭闔開履下鴻鴈飛  
宮室低迤邐群山小參差俯仰宇宙空庶隨了義歸  
崩岑非大厦久居亦已危

早朝大明宮呈兩省寮友 王維

絳幘雞人送曉籌尚衣方進翠雲裘九天閭闔開宮  
殿萬國衣冠拜冕旒日色纔臨仙掌動香烟欲傍袞  
龍浮朝罷須裁五色詔佩聲歸到鳳池頭

同前 岑參

雞鳴紫陌曙光寒鸞嚮皇州春夜闌金鎖曉鐘開萬  
戶玉階仙仗擁千官花迎劔佩星初落柳拂旌旗露  
未乾獨有鳳凰池上客陽春一曲和皆難

梁園醉歌 李白

我浮黃河去京闕掛席欲進波連山天長水闊厭遠  
涉訪古始及平臺間昔人豪貴信陵君今人耕種信  
陵墳荒陵虛照碧山月古木盡入蒼梧雲

魯郡石門送杜甫 李白

醉別復幾日登臨徧池臺何言石門路重有金樽開  
秋波落泗水海色明徂徠飛蓬各自遠且盡手中杯

沙丘贈杜甫 李白

我來竟何事高卧沙丘城城邊有古樹日夕連松聲

魯酒不可醉齊歌空復清思君若汶水浩蕩向南征

贈杜甫

李白

飯顆山頭逢杜甫頭戴笠子日卓午借問新來大瘦  
生止為從前作詩苦

堯祠贈杜補闕

李白

我覺秋興逸誰言秋氣悲山將落日去水與晴空宜  
雲歸碧海少鴈度青天遲相失各萬里茫然空爾思

梁宋

高適

梁王昔全盛賓客復多才悠悠一千年陳迹惟高臺  
朝臨孟諸上忽見芒碭間赤帝終已矣白雲長不還

曉發江上

賀知章

江臯聞曙鐘輕曳履還舸如見江上釣猶埋雲外峯

有客

李適之

避賢初罷相樂聖且啣盃試問門前客今朝幾箇來

金陵月夜喜李白至

崔宗之

耿耿意不暢悄悄風葉聲思見雄俊士快話古今情  
清論既抵掌言談又絕倒分明楚漢事歷歷王霸道  
袖有七星劍懷中茂陵書雙眸光照人詞賦凌子虛

谷

李白

朔雲橫高天萬里起龜色壯士心飛揚落日空歎息

長嘯出原野凜然寒風生起舞拂長劍四座雲崢嶸

過賈六至

蘇晉

主人病且閑客來情彌適一酌復一笑不知日將夕

在郡秋懷二首

張九齡

秋風入前林蕭颺鳴寒枝寂寞游子思寤歎何人知  
官成名不立志在歲已馳五十而無聞古人深所疵  
平生去外飾直道如不羈未得操割效忽復寒暑移  
物情無故然身退毀亦隨悠悠滄江渚望望白雲涯  
露下霜且降澤中草披離雜艾若不分何用馨香爲

又

庭蕪生白露歲候感遐心策蹇躑遠塗篋枝忘故林  
小人恐致寇終日如流深魚鳥好自逸池籠安所欽  
挂冠東郭門採薇南山岑議道誠愧昔覽分還慙今  
憮然憂成老空爾白頭吟

上廣帥李公

蘇渙

養蚕爲素絲葉盡蚕不老頃筐對空牀此意向誰道  
一女不得織萬夫受其寒一夫不得意四海行路難  
禍亦不在大禍亦不在先世路險孟門吾徒當勉旃

又

毒蜂一巢成高挂惡木枝行人百步外目斷魂爲飛

長安大道邊挾彈誰家兒手持黃金丸引滿無所疑  
一中紛下來勢若風雨隨身如萬箭攢究轉迷所之  
徒有疾惡心奈何不知機

日月東西行

蘇渙

日月東西行不照大荒北其中有毒龍靈怪人莫測  
開目爲晨光閉目爲夜色一開復一閉明晦無休息  
居然六合內曠哉天地德天地且不言世人浪喧喧

贈司空拾遺

沙門大易

詔因何事辭雲陛江上微吟見雪花望闕未容窺日  
月閉門空自傲煙霞

宿天柱觀

沙門大易

泉涌堦前地雲生戶外峯中霄自入定不是欲降龍  
湘夫人祠

沙門大易

靈祠古木合波颺大江濱未作湘南雨知爲何處雲  
苔痕澁珠履艸色妬羅裳妙鼓彤雲瑟羈臣不可聞

過裴虬郊園

劉長卿

郊原春欲暮桃李落繽紛何處隨芳草留家寄白雲

流桂州

張叔卿

莫問蒼梧遠而今世路難胡塵不到處即是小長安

空靈

前人



寒盡鴻先去江迴客未歸  
早知名是幻不敢繡為衣  
霧積川原暗山多郡縣稀  
今朝下湘岸更逐鷓鴣飛

道林

崔珏

長卿之問久冥冥  
五言七言夸規模  
我吟杜詩清入骨  
灌頂何必須醍醐

嶽麓道林

前人

暖日斜明蟬竦梁  
濕烟散暮鴛鴦  
瓦沈裴筆力闢雄  
壯宋杜辭源兩風雅  
他方居士來施齋  
彼岸上入投結夏

使南海道長沙

侍御史唐扶

道林岳麓仲與昆  
卓學請從先後論  
松根踏雪二千步  
始見大屋開三門  
泉清或覩蛟龍窟  
密豁數盡高帆掀  
荒唐大樹悉柵桂  
細碎小艸多蘭蓀  
沙彌去學五印字  
靜女來懸千尺幡  
兩祠物色採拾盡  
壁間杜甫真少恩

和

湖南觀察使沈傳師

承明年老輒自論  
乞得湘守東南奔  
爲聞楚國富山水  
青嶂邈迤僧家園  
含香珥筆皆眷舊  
謙挹自忘臺省尊  
不令執簡候亭館  
直許携手游山樊  
忽驚列岫晚來逼  
積雪洗盡烟嵐昏  
華鑣蹀躞絢砂步  
大旆繁

錯輝松門樛枝競鶩龍蛇勢折幹不沒風霆痕相重  
古殿倚巖腹別引新徑縈雲根目傷平楚虞帝魂情  
多思遠聊開樽危弦細管逐歌颺畫鼓繡靴隨節翻  
鐔金七言凌老杜入木八瀟蟠高軒嗟余絕倒久不  
和忍復感激論元元

遇李龜年

青春事漢主白首入秦城遍識才人字多知度曲名  
風流悲故事語笑合新聲獨有垂楊樹偏傷日暮情

連州臘日觀莫徭獵

劉禹錫

海天殺氣薄蠻軍部伍囂張羅依道口嗾犬上山腰

莫徭自生長名字無符籍市易雜鮫人婚姻通木客  
星居占泉眼火種開山脊夜渡千仞谿含沙不能射

杜甫同谷茅茨

趙鴻

工部棲遲後鄰家大半無青羗迷道路白社寄杯盃  
大雅何人繼全生此地孤孤雲飛鳥什空勒舊山隅

栗亭

趙鴻

杜甫栗亭詩詩人多在口悠悠二甲子題紀今何有

讀杜詩

杜牧

杜詩韓筆愁來讀似倩麻姑痒處抓天外鳳凰誰得  
隨無人解合續弦膠

耒陽

羅隱

楚水悠悠浸耒亭  
楚南天地兩無情  
忍教孫武重泉下  
不見詩人說用兵

耒陽杜工部祠堂

徐介

手接汨羅水  
天心知所存  
固教工部死  
來伴大夫冤  
流落同千古  
風騷共一源  
消凝傷往事  
斜日隱頽垣

題杜工部墳

韓愈

何人鑿開混沌殼  
二氣由來有清濁  
孕其清者爲聖  
賢鍾其濁者成愚  
撲英豪雖沒名  
猶嘉不肖虛死如  
蓬麻榮華一旦  
世俗眼忠孝萬古  
賢人芽有唐文物

盛復全名書史冊  
俱才賢中間詩筆  
誰清新屈指都  
無四五人獨有工  
部稱全美當日詩  
人無擬倫筆追  
清風洗俗耳心奪  
造化回陽春天光  
晴射洞庭秋寒  
玉萬頃清光流我  
常愛慕如飢渴不  
見其面生閑愁  
今春偶客耒陽路  
淒慘去尋江上墓  
召朋特地踏烟  
蕪路入溪村數百  
步招手借問騎牛  
兒牧兒指我祠  
堂路入門古屋三  
四間草茅綠砌生  
無數寒竹珊珊  
搖晚風野蔓層層  
纏庭戶升堂再拜  
心惻然心欲度  
啓不成語一堆空  
土烟蕪裏虛使詩  
人嘆悲起怨聲  
千古寄西風寒骨  
一夜沉秋水當時  
處處多白酒牛

角如今家家有飲酒食肉今如此何故常人無飽死  
子美當日稱才賢聶侯見待誠非喜洎乎聖意再搜  
求姦臣以此欺天子捉月走入千丈波忠諫便沉汨  
羅底固知天意有所存三賢所歸同一水過客留詩  
千百人佳詞繡句虛相美墳空歛死已傳聞千古醜  
聲竟誰洗明時好古疾惡人應以我意知終始

杜工部外集卷之一終

### 刻李杜全集後

昌黎韓子文起八代之衰於詩獨推

李杜其言蓋屢見於集中晦菴朱子

集諸儒之大成教人學詩必先看李

杜如士人習本經本既立方可次及

諸家二公於李杜亟稱如此則夫有

志於詩者不可不知所趨向哉顧二家

之集箋註叢出使其平易正大之詞  
反若艱深隱廢之語學者滋惑徃徃  
以李杜藩籬為難窺良可嘅也齋居  
之暇偶得二集於吾宗先達燕齋先  
生之裔孫文儒李集則有文附焉鐫  
如其舊而杜集則伐去其箋解鳩工  
梓行讀者於此反復諷詠而有得焉

則知唐宋二大儒之言為不我欺抑  
不負吾燕齋珍藏之善也工完爰述  
鄙意于後以諗夫學詩者云  
大明正德八年歲次癸酉仲秋朔日  
古歛後學棠樾鮑松謹識





杜詩博大沈懋尉媿美風雅古人所稱予亦  
 何言焉宗臣嘗言寒可死衣饑可死食而  
 此書不可以一時廢也知言哉蓋禮樂殘缺誰  
 觀其美唯詩也從容微婉左右逢原无嗇之樂  
 亦以可終歲矣予亦置之于坐右放古不徹珎今  
 珎必之意云

慶應丙寅春

葛重良誌



